

## *ASO GAFUA, 26 IUNI 2023*

*Na nofoia e le Fofoga Fetalai le Nofoa i le itula e 9:30 i le taeao.*

Tatalo.

**FOFOGA FETALAI:** Ou te faasilasila atu ua amatalia nei Taulumaga a le Fono Aoaofa Fitolafono.

Ou te faafeiloai atu i leni taeao fou o le amataga foi o leni vaiaso i le toe tauaofia ai o le tatou Palemene mo le toe faaauauina o le tatou galuega. O paia lava o le Maota nei, o mamalu e tumau e oo i le faavavau, e le toe tau tapu'eina i le gagana a le Fofoga Fetalai. ua tatou fesilafai i leni taeao, Ua le o se tala nai olofaga, a o le alofa tulituliloa o le tatou Atua. Foi atu pea ia le viiga ia te Ia, o le ua tatou fesilafai ai i manu ma oaoa ai i faleseu i leni taeao, ua maleifua mai ai i le lagi e mama ma le soifua manuia le paia o le Palemene.

I le afio o lau Afioga i le Tamaitai Palemia, afio lau Afioga i le Sui Palemia, afio a outou Afioga i Minisita o le Kapeneta, ae tainane a outou Afioga i Minisita Lagolago.

Afio foi lea Itu o le Maota ma sui usufono mamalu uma o le tatou Palemene. Ou te ofo alofa atu ma faatalofa atu i leni taeao, malo le soifua manuia ma le lagi e mama.

E faatalofa atu foi i Ofisa Sili o Pulega o Matagaluega ma Faalapotopotoga Tumaoti a le tatou Malo, ua mafai ona tatou mafuta i leni taeao, faamalo le usu. Le tapuaiga a lau Afioga i Le Ao Mamalu o le tatou Malo ma lau Masiofo, le Sui o le Fono a Sui Tofia ma lou Faletua, le Faamasino Sili ma le mamalu o le Faamasinoga. E ofo alofa ma faatalofa atu lau Palemene i leni taeao.

Lau tapuaiga Samoa le atunuu pele i ou tulaga faalagia, o mamalu lava mai le vavau e oo atu lava i le faavavau, e leai se na te toe autalaina. E faapea foi le tapuaiga mana a auuina o le Talalelei, matou faatalofa atu i leni taeao.

E le faagaloina foi le tapuai mai a nai o tatou uso i sasae i ou paia faale-Talalelei, o ou mamalu faale-Malo, o ou sa ma mamalu faale-Malo, o ou sa ma faiga faaleaganuu, matou te ofo alofa atu ma faatalofa atu i leni taeao.

Le alofaiva o le tatou Maota i leni taeao, ia agalelei le Alii, ia tatou seu i atasina, ae le o atauli. Ia manuia le usugafono a le paia o le Palemene, ia manuia le tapuai mai a Samoa.

**TULAFONO TAU FAAOFI O LE FAATATAUINA O TUPE**  
**2023/2024 – felafolafoaiga faaaauu i luga o le**  
**faitauga faalua - Aso Fono Iona 5**

**FOFOGA FETALAI:** E tolopo Tualumaga a le Fono Aoaofaitulafono i le Aso Faraile o le vaiaso na se i mavae atu nei o lo o saunoa le sui usufono mo Falealili 2.

Ia, o le avanoa leni i lau Afioga i le sui usufono mamalu mo Falealili 2 e faaaauu lau saunoaga.

**Afioga MAIAVA FUIMAONO TITO ASAFO (Falealili 2):** Faafetai i lau Afioga i le Fofoga Fetalai mo le avanoa faalua e faauma atu ai ni lagona ma ni manaoga o leni itumalo mai Falealili 2. E manatu o lea ua maea ona e momoli laau i Fogaa ma fana le u i le vateatea aua le tatou vatapuia ma le Atua. Ia tau ia o se pua e ula le tautau o le alofa ma le agalelei o le Atua e pei ona fofogaina e lau Afioga i le Fofoga Fetalai. E momoli atu ai le agaga faafetai i lau Afioga e tusa ai ma le tatou taulaga ua siitia i le Atua aua leni taeao.

E manatu o lea ua laga le vaa o manu ae faafao le vaa o mala, aua o lea ua tea i tua Apolima ua tino mai le soifua. Ua mavae atu foi le atuava ma le atuvasa, ua tatou fetapai i le lagi e mama ma le soifua maualuga ma sui usufono o le Palemene uma i leni taeao. O lea ua tatou tumuai tutusa i le alofa o le Atua, ua tatou numia i nuu e tasi e pei o le igoaipu a Sifuiva, ua tatou lalagofaatasi e pei o le igoaipu a Sa Tupua. Ua tatou lalagofaatasi i le alofa ma le agalelei o le Atua i leni taeao. E manatu o lea ua uma ona e paepaeulufanua paia ma mamalu o Samoa, o le a le toe oo i ai se leo o leni itumalo.

Ae faatalofa atu ma le agaga maualalo i lau Afioga i le Fofoga Fetalai, malo le soifua manuia, malo le lagi e mama.

E faatalofa atu foi i lau Afioga i le Tamaitai Palemia, Sui Palemia, alii ma tamaitai Minisita o le Kapeneta, tainane foi le vasega o Minisita Lagolago o le tatou Malo.

E faapea foi i lea Itu, e faatalofa atu i lau Afioga i le Taitai o le Itu Agai faapea sui usufono mamalu uma o le Palemene.

E faafeiloai atu foi i lau Susuga i le Failautusi ma lou Soatau faapea foi le Matagaluega. E faatalofa atu foi i Ofisa Sili o Pulega o Matagaluega a le Malo ma Faalapotopotoga Tumaoti. E faapea foi Samoa ua potopoto.

E faatalofa atu foi i lau Afioga i le Loia Sili ia po o lau Afioga foi i le Gafatasi. Faafetai o lea ua e pale mai foi i le suafa Fuimaono o leni nuu o Salani i Falealili. Faafetai foi i le paia o Aiga i le Fuaifale o Fuimaono Sa Tutagalevao e tusa ai ma le faeaea i le suafa Fuimaono, ia o lea ua faapaleina ai lau Afioga. Ia manuia lou tulai mai.

Lau Afioga i le Fofoga Fetalai, na ona ou fia afe ane lava i le tapuaiga a si ou itumalo. Ou te faatalofa atu ai i lou itumalo o Falealili 2 po o Falealili Sasae. O paia o le tatou falelua mai Salani, Salesatele, Sapoe, Utulaelae ma Siuniu. O paia lava lea aua le afifio o Sa Fenunuivao ma le latou Tama, afio Fuimaono ma ou alo tutusa, afio Sifuiva o le Matuaalii, susu mai Leasiolagi o le Saoao, maliu mai lau Tofa i le Igoamatua, ae alaalatai Sa Taeleava, tainane le Fuaiala. Aemaise foi Tupua ma le aumaga, tulouna Sataneavae o le aliimau o Faleupolu.

O paia foi aua le paia o Tapulesatele ma ou alo, afio alo o Leilua, afio mai Paitomaleifi o le Aloalii, susu lau Susuga Leota, alaalatai foi le Matua ma Tama a le Falelua, faapea foi le Toafa Talimalama ma upu i le Fuaiala.

Afio foi Alaalatoa ma alo o Samalaulu, maliu mai lau Fetalaiga Gaopoa o le Tulafale a le Tuiatua. Maliu mai Letoga Leulupuaa o oe o le Faialaga, tulouna lau Tofa Faatili tainane Sa Faatili ma lona Faleono.

Afio foi le Aloalii, Susu Tufugafale ma Seugalii, ae alaalatai le Faletolu, afio foi le Taofia a Moetalalelei, ae alaalatai oe le Taofia. Ou te manatu o paia ia o si ou itumalo o lo o taputapu mai.

E le vaea foi le falaooto i lea itu o le Gafa, e ui lava ina vaeluaina ona o itu faapalota, ae o Falealili lava ia o le aiga, o Falealili foi o le itumalo. I le afifio o Alaalagafa, maliu mai la oulua Nofa a Tulafale, ma le Taugaeseese ia Falealili.

E le faagaloina foi le tapuaiga a suli ma feoi o le talalelei i totonu o si ou itumalo. I le susu o lau Susuga i le Toeaina Faatonu, lau Susuga Tunumoso Iosia po o lau Susuga foi i le Sui Taitaifono a le Fono Tele o le EFKS ma lou faletua, faapea foi le nofo a faafeagaiga ma o latou faletua i so o se fatafaitalaga e fi ai totonu o lou itumalo faapalota o Falealili 2 ma Falealili Sisifo.

E le faagaloina foi le tapuaiga a nai ou matua faaleagaga, lau Susuga i le Faafeagaiga Kolio ma le faletua ia Lupe, faafetai tatalo, faafetai foi mo talosaga tuuina atu i le Atua i le ao ma le po aua se manuia o aiga, o nuu, o Ekalesia ma le itumalo, aemaise foi le tapuaia o matou faiva a o matou feagai ai ma le valaauina i upufai o Malo aua se manuia o le atunuu.

Ia, tapuai maia se i fai se tatou sao aua le Tala o le Tupe ua folasia i le Maota nei. Ia, si ou uso a faipule, vaeane tafatafafuga i lau Afioga i le Minisita o Fesootaiga i luga o le ea ma le lauelele, ia tapuai maia se i fai se ta tala. Afai e i ai se mea e galo, ia faamanatu ane e lau Afioga.

Lau Afioga i le Fofoga Fetalai, i le maea ai o le tatou fonotaga i le vaiaso talu ai ua maea nisi foi o talosaga ma manaoga o lenei itumalo, e pei foi ona talosaga atu ai i le Afioga i le Minisita o Tina ma Tamaitai mo se masini e faatino ai matou aualagalua ona ua taugata tele konekarate mo le faatinoina o galuega.

Lau Afioga i le Fofoga Fetalai, o lea foi sa talosaga atu i le Afioga i le Minisita o Galuega Tetele a le tatou Malo mo se fesoasoani aua le faia o

aualagalua o si ou itumalo, ona e le lava le paketi a lenei itumalo e faatino ai auala galua pe a fika atu i le tau o konekarate ua tuuina mai. Ia a lava a le tai 4 kilomita o auala taitasi ia e fai, a o isi kilomita o le a faaaogaina ai le matou \$1 miliona e pei ona tuuina mai.

O lea foi sa tatalo atu ma le agaga faaaloalo i lau Afioga i le Minisita ma le tatou faigamalo mo le faia lea o le auala lea e igoa o le alasopo i gauta o le nuu o Salani. E le gata i le tuuititia o le mamao o femalagaaiga a le itumalo ma le mamalu o le atunuu, ae o lo o i ai ma le suavai e aoga mo le fofogataumafa o le atunuu. O le vai lea lau Afioga sa faaaogaina e le aoga a Kosena, le aoga a le Ekalesia Asofitu, peitai sa faaleagaina e afa tetele e lua sa aafia ai si o tatou atunuu i tausaga foi ua mavae atu.

Ia, o le isi talosaga lau Afioga i le Minisita o Galuega a le tatou Malo, o le aualasima lea e va ai le matou nuu i Salani ma Lotofaga i uta, se i silasila ane lau Afioga ma le Matagaluega po o saogalemu pea mo femalagaaiga a le mamalu o le atunuu, ona o le aualasima lea, na fausia i le vaitaimi o Siamani, ae na o se faamanatu i lau Afioga ma le Matagaluega. Ia afai sa asia muamua e le Matagaluega o lo o lelei, ia e leai se mea o i ai. Ae faataatia atu pea i autafa atonu e o oi ai lau faasoa i se taimi, ia e le o toe mamao.

Ia atonu foi toeitiiti oo atu lau faasoa i ni mea foi sa talosaga muamua atu e pei o le suavai i Salani-uta ia ma se patupatu i luma o le Maota o le faafeagaiga EFKS i Salani-tai, ia ma ni moli auala i Sapoe ma Utulaelae, faatasi ai ma ni faailoilo e iloa ai le auala e alu agai Aleipata ia ma le agai mai i Apia, ona e matauina pea o lo o tele taavale o lo o se atu i Salani-tai ona o le leai o ni faailoilo i lea vaega o le auala. Ma le agaga faaaloalo i lau Afioga.

Ia, lau Afioga i le Minisita o se talosaga ma se tuualalo, e moni lava o lea ua pasia le Tulafono lea po o le tuueseeseina o le Matagaluega a Leoleo ma le LTA. Faafetai foi i se tofa ua ae i lua Afioga ma le Minisita o Leoleo faatasi ai ma lau Afioga i le Minisita ua mafai ona toe tuueseeseina Matagaluega ia e lua. A o se tatalo i lau Afioga i le tulaga lea o le pasiaina o taavale laupasese. O lea foi sa i ai i se taimi muamua, e faalua ona pasi taavale mo le tausaga atoa, ae molimauina lava o lea e faa-4 lava ona pasi tatou taavale mo le tausaga. Ae na o se tuualalo i lau Afioga ma le Matagaluega, pe mafai ona tatou toe foi i tua i le lua pasiga i le tausaga, ona o lenei le itu lau Afioga, e le o faigofie foi i le aufaitaavale i le tapenaina o latou taavale e tai-3 masina ma pasi. O lona uiga e faa-2 ona tapena le taavale, ia e le faigofie foi le tapenaga o taavale aga ii pasia ia ona mo le silafia e lau Afioga, e oo atu i pasiga ia, e le i lava a se seleni e toe totogi ai tatou pasiga taavale ia, ona o le taimi nei ua fai sina taugata o le kiso ma le penisini. O le ala lea e tatalo atu i lau Afioga pe mafai ona pasi i le amataga o le tausaga ma lona faaiuga i masina e lua e pei ona masani ai. Ae ua lava a le totogi, o lea a e manaia le totogi lea e totogi ai nei i le tai \$400 i le pasiga

taavale. Ae na o se tuualalo i lau Afioga ma le Matagaluega, e faataatia atu o lo o i ina le tofa ma le faautaga i lau Afioga.

Lau Afioga i le Fofoga Fetalai ona ou oo mai lea i le Minisita o le Siosiomaga. Ia o le tatalo lava a lenei itumalo i taligalu, ia, e na o le faamanatu atu lava i lau Afioga ona ua tele le afaina o si ou itumalo ona o le fesuaiga o le tau ua i ai nei.

Lau Afioga i le Minisita o Leoleo, lau Afioga i le Fofoga Fetalai, e momoli atu le agaga o le faafetai ma le faamalo i lau Afioga i le Minisita e tusa ai foi ma le faatinoina o galuega a le Matagaluega, aua le puipuiga o le saogalemu o le mamalu o le tatou atunuu. E faafetai atu foi i le auunaga o lo o i tua i Falealili i le Ofisa o le Malu o le Malo mo le faatinoga foi o latou tiute. O lo o lelei mea uma, lelei le galuega foi o lo o faatino e le Malu foi o le Malo o lo o feagai ma o latou tiute i Falealili.

Pau se tatalo i lau Afioga i le Minisita, e talosagaina ai se taavale fuimu po o se Ofisa i tua o lenei itumalo ona ua tele foi taavale foi ia pei ona molimauina e oo lava mumu i le auuala, vaeane le paia o le Maota nei. O lea e tatalo atu ai i lau Afioga, ia o lo o i ai lava isi foi fanua o le tatou malo o lo o i tua mo le faatuina o Ofisa ia i tua i le itumalo o Falealili.

**FOFOGA FETALAI:** Toe 3 minute o le sui usufono.

**Afioga MAIAVA FUIMAONO TITO ASAFO:** Lau Afioga i le Fofoga Fetalai, ia ona ou oo mai lea i le Afioga i le Minisita o Faatoaga ma Faiga Faiva faapea foi le SROS ma le STEC.

Ia, ou te manatu o se laolao lelei lenei mo au e fai atu ai se tala ma le agaga faaaloalo i lau Afioga i le Minisita o lenei Matagaluega o Faatoaga ma Faiga Faiva, lau Afioga Laaulialemalietoa Leuatea Polataivao. O le paia lava lea aua le afio o Sa Tupua ma Sa Malietoa, ma le mamalu i le faletolu. A lafalafa tuna, ia o oe o le suli moni o le Suafa Fuimaono, lea ua e pale mai ai, ia o lou gafa foi ua tau i le niusina i le Suafa Fuimaono, o le Tama a Tausala atoa, o le gafa e tasi ia Samoa atoa, o le uluai tupu na tafaifa o Salamasina. Tulouna la paia ma mamalu o si o tatou nuu i Salani Falealili, ia, o lena e te tausi o lea foi ou te faapelepele i ai.

Lau Afioga i le Minisita, ou te le tau selu atu i lau Afioga, malo toa malo le tau, malo foi le lototele i fita ma faigata o lo o feagai pea ma lau Afioga i aso uma ma taimi uma i upu faifai ma upu faalumaluma o lo o agai atu pea i lau Afioga, ae o lo o olo pea le fua. Ae fai mai upu o le Tusi, “Ia e sili lava le toa na te pulea lona loto nai lo le toa na te aea le olo.” Malo le onosai, malo le faatoatoa i lau Afioga. Faafetai foi i lau Afioga i lou amanaia o lou nei faatauvaa aua le faatinoina o ta uluai seleselega, aemaise o le faatinoina o isi tiute ma galuega fai i totonu o le ta Matagaluega pe a le avanoa lau Afioga. O le tele o aso ta te faasoa ai ma matimati galuega fai a le ta Matagaluega, o le ala foi lena ua leai ai ni manaoga o lenei itumalo i lau

Afioga ma le Matagaluega. A i ai lava ni mea ou te manao ai, ou te musumusu atu lava i lau Afioga i le Minisita. Faafetai mo le faasoa, o fautuaga ma timaiga ma le tuualalo ua lagona ai lava le lototele e faatino galuega.

E avea foi lenei avanoa e momoli atu ai le faafetai ma le faamalo i le aufaifaatoaga, aufaifaiva ma le aufailafumanu uma o si o tatou atunuu. O le fautuaga, ia lava mai pea le onosai, o lea lava e faataavalevale atu le tatou mataupu.

Lau Afioga i le Fofoga Fetalai, ia ona ou oo mai lea i uluai seleselega. E sau se taimi saunoa le Afioga i le Minisita o Faatoaga ma Faiga Faiva, e faamalamalama ma faalauaitete nisi foi o vaega e fia malamalama ai le mamalu o le tatou Palemene aemaise le tatou atunuu. A o lenei avanoa e manatu e momoli atu ai le faafetai tele ma le faamalo i Afioga i Minisita ma sui usufono uma o itumalo taitasi sa mafai ona faataunuuina a latou uluai seleselega i masina foi ua tuanai atu. Faafetai mo tapenaga, ua matagofie mea uma.

Lau Afioga i le Fofoga Fetalai, o le polokalame lenei o le uluai seleselega, ia o se polokalame e tele lona taua ma lona aoga i le mamalu o le atunuu. Afai foi na oge le atunuu i na tausaga ua mavae atu, ia o le faamaite lena a le tatou faigamalo o le avatu lea o uluai seleselega e faatino i totonu o itumalo taitasi uma o le atunuu ina ia laugatasia uma le atunuu ma le aufaifaatoaga i faamanuiaga mai le tatou Malo.

O le polokalame foi lea e affio atu ai le tatou Malo ma le Matagaluega e avatu le faamalosiua ma se tuualalo i le aufaifaatoaga ma le aufailafumanu ma le aufaifaiva e toaaga e gagau le vao ma faasao le gataifale, ma momoli atu meafaigaluega e fesoasoani ai i latou atinae. A le lava foi meafaigaluega, ia o lena foi ua tuuina atu le tatou \$1 miliona e talosaga ai le faifaatoaga lava ia, faifaiva ma le failafumanu i meafaigaluega e fesoasoani mo lau atinae. Ia e manatu foi o lenei polokalame ia e le o ni palapala a malo po o nisi mea, a o le auga lava ma le faamoemoe o lenei polokalame ia lava taumafa i totonu o itumalo taitasi. Ia lava meaaano, lava mealelei, lava i'a o le sami e tali ai la outou sua i aso uma, ia ma toaaga e fafaga a tatou povi, puua, fafaga ia lava mamoe ma moa, o i tatou te tali atu ai i le taugata o le soifuaga ua i ai nei.

O nisi foi saunoaga e faapea ua oge le tatou atunuu, ou te molimau atu ma le agaga faaaloalo lau Afioga i le Fofoga Fetalai, e le o oge le tatou atunuu o lea e mau. A lea e molimau le tatou Matagaluega i le matou polokalame na faagasolo i itumalo taitasi uma o le tatou atunuu, e leai ma se itumalo na faatamala se latou tapenaga i uluai seleselega sa faatinoina, aemaise lava i fua o faaeleeleaga. O lou lava faatamala ma le le tagolima o le a e le selesele ai ma e ai.

Ia mo le silafia e le tatou Palemene, e ova atu ma le 60 i le 70 container moa o lo o auina mai atunuu i fafo o lo o tatou taumamafa ai. O nisi na o

faamaumauga o lo o i le Matagaluega. O le ala foi lena o le tuualalo a le Afioga i le Minisita ma le Matagaluega, ia...

**Afioga Sulamanaia Fetaiai Tauilili Tuivasa (Vaimauga 1):** Lau Afioga i le Fofoga Fetalai...

**FOFOGA FETALAI:** Malie le sui usufono mamalu, o lo o i ai le faauilavea... O le a le uiga o le faauilavea a le sui usufono mo Vaimauga 1?

**Afioga Sulamanaia Fetaiai Tauilili Tuivasa:** O se mea e fia faamalamalama i le Vaega 82 o le Tulafono Tumau.

O le saunoaga a le sui usufono e matau atu e le nei Itu, e pei o la e faitau. Lona lua, e matau atu e faafesili i le sui usufono po o lea ua tali le Minisita. Pei o lea e matau atu pei o le tali a le Minisita lea e... Ia o nai mea na e fia malamalama ai lenei itumalo.

O le mea muamua, ia o lea e faitau mai lava i le amataga e oo mai lava i le tulaga lenei. Lua, o ana saunoaga lea e fai pei o lea o le part lea a le Afioga i le Minisita e tatau ona saunoa i ai. Ma lou faaaloalo lava lau Afioga i le Fofoga Fetalai.

**FOFOGA FETALAI:** Ia, o lea ua maua atu e le Nofoa lou finagalo. O le tulaga i le saunoaga a le sui usufono mamalu, o lo o i ai foi ma lona tiute faa-Sui Minisita, o la e lava pei e fesoasoani foi i nisi o finagalo sa faaalua, ae o le tali atoatoa, o lea e faafogafoga mai le Afioga i le Minisita.

Ia, o le mea lena i le tulaga o le faitau, ia...

**Susuga Hon Laauli Leuatea Polataivao Fosi (Minisita o Faatoaga ma Faiga Faiva):** Lau Afioga i le Fofoga Fetalai...

**FOFOGA FETALAI:** E le o maua atu i luga nei, ae aoga lava le... o le uiga o le fai ma silasila i lalo ina ia manatua pea lauga ma le faasologa o lauga. Ae le o i ai foi se tulaga faapena i le matau atu a le Nofoa i le faitau.

Ia se i tulai mai lau Afioga i le Minisita mo Faatoaga ma Faiga Faiva.

**Susuga Hon Laauli Leuatea Polataivao Fosi:** Faafetai i le Atua ua tatou aulia lenei taeao fou i Lona alofa ma Lona agalelei, ua faasolo foi le tatou fonotaga. Leai ua ou tulai atu e faamalamalama atili le saunoaga a le Afioga i le Minisita Lagolago. Ou te manatu o lo o taoto pea i lagatonu ona o le tele o le mataupu lenei o le uluai seleselega, a ou le avanoa, o le Afioga i le Minisita Lagolago e afio e faatino si a ma galuega. O le mea la lea e saunoa i ai le Minisita Lagolago, o lea e saunoa mai i itumalo uma lava na agai i ai le faamoemoe lenei.

Ae ina ua ou maua i le faaiuga o le vaiaso lenei ina ua ou le fonu, oi, ua amata ona sau le iuleo e matua faitioina lava mea nei o uluai seleselega lau Afioga i le Fofoga Fetalai. Sa ou faalogologo lelei mai ma le toto'a, po o ai tonu lava latou nei ua faia le auala e sese ai le faalogo a le atunuu. E le taua, sau ai la ma le upu lea lau Afioga i le Fofoga Fetalai, lea sa saunoa i ai le Afioga i le Minisita Lagolago, ua oge Samoa. Ae ou maua mulimuli, o le sui usufono mo Anoamaa ma le sui usufono mo Safata, o laua nei o lea ua kiliva nei le upu lea i l atunuu, e le tatau ona toe faia uluai seleselega. O le fesili la lau Afioga, o le a le mea na o atu ai i lou Ofisa e talosaga uluai seleselega a lua itumalo? O le a le mafuaaga na ala ai ona outou oo atu e talosaga ina ia o atu le Matagaluega ma le faigamalo e faatino le uluai seleselega?

Lau Afioga i le Fofoga Fetalai, se e lagona lava le faanoanoa ona o tulaga ia, ia lea ua laulau mai nei, o lea faatoa ou faitau atu nei i le Hansard o le vaiaso lea na tea atu nei, e tuga tele, tuga le oo atu i lou Ofisa e talosaga e oo atu e faatino le uluai seleselega, ae toe omai i nei i le Maota, ua ese lava upu ua fai ma laulau mai mea um aua taitasi ma le afa uilipaelo a le itumalo. Ia o le a taatia i le Maota saunoaga ia mo le lumanai. A o lea ua saunoa atu le Afioga i le Minisita Lagolago o le faamaite a le Malo ia mau ia Itumalo. O le a le fofo o le tau o le soifuaga? E le mafai ona tatou puleaina, e pule a atunuu mai fafo i le tau o latou oloa, lea tatou te ola faalagolago i ai. A o le a le uiga o le polokalame lea e avatu? Toto ia lava meaai aano, fafaga ia lava mealelei, faafaiilelei i'a o le sami, ia lava le inai, ona a loa lea? O le tali lena o le tau o le soifuaga le tatou te i ai i le taimi.

Ia o le mea lea o le tou o atu o atu i lou Ofisa talosaga le Malo e o atu ae toe faitio i le o atu? Se ou te ofo le Aiga Sa Tunumafono, o la e faafofoga mai le Itumalo, o a tatou upu na fai i lea aso? O le Malo e tulai mai o le Malo lena e omai e opogi. A o le a le mea lea e laulau i le Maota? E leaga, e le lelei ma e le faamaoni e oge le atunuu. O le ala lea lau Afioga i le Fofoga Fetalai ua ou tulai leaga o le matafaioi tonu a lea a Fuimaono na afio e fai. Ae momoli atu ai le agaga faafetai i Itumalo uma lava sa outou talisapaia le agaga o le taumafai atu o le tatou Matagaluega.

E lua lava tauvaga na fai i tausaga uma, alu ai le \$600 i le \$500 afe tala, e tasi Apia tasi Savaii a o lea le mea lea ua fai? E tofua le Itumalo ma le faaaliga, vaevae le tupe lea e tai \$10 afe a le Itumalo. Pau lena o le paketi lea e faataga mai e le Palemene ma le Matagaluega o le Tupe e fai ai tatou seleselega. Afai la tou te mananao e faatele, talosaga i le Minisita o Tupe. O le a lau mea e fai na o le \$500 afe lea e aumai e le Malo e poipoi ai tatou fuafuaga uma? Ae pei o le agaga lena ua ou manatu lau Afioga i le Fofoga Fetalai e tatau ona faamanino leaga o la e faafogafoga mai Samoa. O se poloketi o atinae lelei mo le atunuu, ae a faaleaga loa o le finagalo lena o le sui ma lou agaga faaaloalo.



**FOFOGA FETALAI:** Ia talu ai o lea ua maua foi le avanoa o le Minisita sa toesea a o lea ua faailoa mai foi nisi leaga o lea e i ai faamaumauga o mea sa outou saunoa foi i ai nisi o sui. O le ala foi lea ua faamalamalama ai e le Afioga i le Minisita, a o le tulai mai o le Afioga i le Sui Minisita e i ai foi lona tiute.

**Afioga Leaana Ronnie Posini ( Safata 1):** Lau Afioga i le Fofoga Fetalai...

**FOFOGA FETALAI:** E i ai foi lona ia tiute faa-Sui Minisita e pei ona tau faailoa mai mo le silafia e le Maota. E i ai se mea o....

**Afioga Leaana Ronnie Posini:** Lau Afioga i le Fofoga Fetalai, o lea ua saunoa le Afioga i le alii Minisita o lea ua taua ai foi ia lou sui ma lenei Itumalo. E leai e manino a le tulaga o le tala sa fai i le uluai seleselega.

**FOFOGA FETALAI:** Ua i ai le manatu o le nofoa a tatou toe o nei i tua, ua umi ai le taimi o le tatou fonu. O le saunoaga a le Malo o le saunoaga mulimuli lena, e le mafai ona ou toe tuu atu se avanoa e toe felafolafoai ai mea ua tuana'i, aemaise foi leaga o lea ua uma le taimi faatulagaina o lau Afioga i le sui mamalu. O lea ua faasolo le tatou galuega e fai si tele o le tatou galuega. O le mea lea ou te faamalulu atu i le sui usufono, o le saunoaga a ia faamalamalama a le Minisita ona o nisi o saunoaga na mavae atu ae le o i ai i totonu o le Maota. E pei o le tulaga lena, ma e i ai lava le avanoa i le faigamalo e faamalamalama ai ni lafoga sa faia i totonu o le Maota.

O le mea lea ou te faamalie atu ai i le sui usufono, a tatou toe o nei i tua ua umi ai le tatou taimi ae atonu e i ai se taimi ona toe faailoa lea o se mea e te le o fiafia i ai, a o le taimi lenei o lea e faagasolo le tatou galuega. Ma le agaga faaaloalo.

**Afioga Leaana Ronnie Posini:** Lau Afioga i le Fofoga Fetalai, o le ala lea o lou tulai atu e ava tele i lau Afioga ae leaga o lea ua taua lo'u igoa i saunoaga a le Minisita. O le ala lea o le tau faamalamalama o le mataupu. O lea ua taua lou igoa aemaise foi o lenei Itumalo o la e faalogologo mai le matou Itumalo ma le agaga faaaloalo. O le le ala lea, o le uluai seleselega e le o fai atu e matua leaga e leaga le uluai seleselega. A o le tala lea na ou fai atu o lea e oge le atunuu, e fua leaga o lea ou te nofo au i tua o le ala, o le ala lea. Ae ou te le i fai atu e leaga le uluai seleselega ma le agaga faaaloalo.

**FOFOGA FETALAI:** Ia, ou te manatu foi... Ia se i tulai mai lau Afioga i le Minisita o lea ua faauma mai le...

**Susuga Hon Laauli Leuatea Polataivao Fosi:** Faatoa uma nei a na ou faitau i le mea lea i le Aso Faraile, o lea e i i au lafoga tuga e tuuaiina leaga ai le uluai seleselega, ma ou te tali manino pe a oo i lou taimi ae faasaoina le avanoa o le Afioga i le Minisita Lagolago e faaauau ai lana saunoaga. Ou te faamanino au upu ia na fai i i, ou te faamanino au saunoaga ia na fai i i i le faaleagaina o le uluai seleselega.

**FOFOGA FETALAI:** Ia tulai mai le sui usufono mamalu e faamaea mai... ua maea foi lou taimi faamaea mai lau saunoaga.

**Afioga MAIAVA FUIMAONO TITO ASAFO:** Faafetai lau Afioga i le Fofoga Fetalai mo le avanoa. E faamalulu atu foi i le sui o Vaimauga I ona o lea ua ou tulai atu ona o le tele a o le galuega o lea ou te faatinoina, o le ala foi lea o le avatu ai o se tala ma le agaga faaaloalo i lenei itula e tau faamanino ma faapulapula lea vaega. Ae pei foi ona fai atu i le taimi ua sola o le tele lava o galuega fai a le ma Matagaluega, ua tele lava ina ou faatinoina, ae sau se taimi saunoa faamalamalama le Afioga i le Minisita e pei foi ona i ai.

Ae talu ai ona o lea ua faauma mai e le Afioga i le Fofoga Fetalai lou avanoa, o lea o le a faauma atu ae taatia ia nisi vaega o le a saunoa faamanino ai le Afioga i le Minisita e tusa ai ma tuuaiga e pei ona i ai.

Lau Afioga i le Fofoga Fetalai, e avea foi lenei avanoa e faamanuia atu foi lenei Matagaluega o Faatoaga ma Faiga Faiva, i le Susu o lau Susuga i le Ofisa Sili o Pulega lau Susuga Dr Seuseu faapea foi le Pulega ma le Matagaluega o Faatoaga ma Faiga Faiva, faapea foi le Matagaluega o Suesuega Faasaienisi i Samoa nei ma le Matagaluega o Esetete Tausi a Samoa malo le galulue, malo foi le tautua i le tatou Faigamalo.

Lau Afioga i le Fofoga Fetalai, e avea foi lenei avanoa e faaleo atu ai e fai ma fofoga taumolimoli o le Afioga i le Minisita ma le Matagaluega o Faatoaga ma Faiga Faiva e faamaise atu ai i le Fetalai ia Levao po o le Afioga foi ia Mataia po o le Pule Lagolago foi a lenei Matagaluega o Faatoaga ma Faiga Faiva i Salafai, e tusa ai ma le motusia faafuasei o le mafutaga ma le Tina o le Aiga ona o le valaau paia a le Atua. Tatalo pea i le mana o le Atua ia maua le mafanafana ma le lototele i lau Afioga ma le Fanau. Ia maua foi sona nofoaga mau i le Malo o le Atua o lo o tausinio uma i ai le tatou Palemene nei e fia oo i ai.

Lau Afioga i le Fofoga Fetalai o nisi na o manaoga o lenei Itumalo, o lo o i ai pea le tatou \$1 miliona tala o loo faatino ai nisi o fuafuaga ma atinae ma mea manaomia aua se lumanai o le Itumalo. E momoli atu ai le agaga faafetai tele i le tatou Faigamalo mo lea Poloketi taua ma le aoga.

Ia, si ou Itumalo pele o Falealili 2, faamalo faafetai tatalo, faafetai foi mo lau tapuaiga lea ua maea ona folasia nisi foi o manatu ma lagona o le tatou

Itumalo. A i ai foi nisi mea o tou finagalo i ai o le a taumafai lava e faaleo totonu o le tatou Maota.

Lau Afioga i le Fofoga Fetalai e matua lagolagoina lava e lenei Itumalo le Tala Autu o le Tupe 2023/2024 e pei ona folasia nei. Ia manuia tele lau Afioga i le Fofoga Fetalai, manuia foi le tatou Palemene nei, manuia foi le Fonousu a Samoa, ae ou ola i le alofa o le Atua. Soifua ma ia manuia.

**FOFOGA FETALAI:** Malo saunoa lau Afioga i le sui mamalu po o lau Afioga i le Minisita Lagolago e tusa foi o le lua valaauina ma le Afioga i le Minisita.

Ia, o le avanoa lenei o le sui usufono mai Gagaifomauga 2. Tulai mai le sui usufono mamalu o lou avanoa lenei lau Afioga i le Minisita Lagolago.

**Tofa FOISALA LILO TUU IOANE (Gagaifomauga 2):** E manatu ae le i faia se manatu o lenei usugafono ma lenei Itumalo i le Tala Faatatau o le Tupe 2023/2024, e faaaogaina lenei avanoa taua e faatalofa ma faafeiloai atu ai i lau Afioga i le Fofoga Fetalai, lagisoifua lagimatafi lau Afioga a le Tamaitai Palemia ma le Aiga Minisita, ae tainane o Minisita Lagolago. Malutae lenei itu o le malu, afifo mai o Afioga i sui usufono o le Maota Fono o Samoa, soifua manuia i Ofisa Sili o Pulega o Matagaluega a le Malo, ae a Pisinisi Tumaoti i lenei vaega o le taeao. Malo le soifua malo ailao afua ua maua i lenei vaega o le taeao.

Matou te manatu o lea ua uma ona ta le faleta ma taoto le utouto o le atuao o malo i le alofa ma le agalelei o le Atua i Lana puipuiga ia Samoa, lea na e momoli ai e lau Afioga i le Fofoga Fetalai le faafetai i le Atua i le alafai mai o Samoa ma lana Palemene i lenei taeao fou. O Samoa o le atunuu tofi e amata mai Tau i le Matafanua i Saua seia paia le siufanua i Saleatua, tulou. O le Faleagafulu o le fanua, e matafanua i Tula ma Utumea ae siufanua i Lelega ma Selea tulou. O Tumua o le motu, e matafanua i le matamatagi ae siufanua i tulatula, tulou.

O Puleono i Salafai o le fanua, e matafanua i Fogapoa ae siufanua i Tufu ma Pulotu ae siufanua i Tufu ma Toloa tulou, tulou lava. O paia na o Samoa e amata mai i Poumasame seia paia le Papauli i Fili ma Puletuu na ao i ai Malo.

E faatalofa atu foi i le tapuaiga a le Afioga i Le Ao Mamalu o le Malo ma lau Masiofo faapea lau Afioga i le Sui o le Fono Sui Tofia ma lou Faletua. Le Faamasino Sili ma Faamasino o le Faamasinoga o Fanua ma Suafa i alii ma tamaitai o le Ofisa o le Faamasinoga .

Lau Afioga i le Tamaitai Palemia o le Malo o Samoa ma lau Kapeneta, soifua manuia i lau Afioga i le Fofoga Fetalai o le Palemene o Samoa. E faafeiloai atu foi i lau Afioga i le Taitai o le Itu Agai ma lenei Itu. E faatalofa atu foi i Ofisa Sili o Pulega o Matagaluega a le Malo ma Faalapotopotoga Tumaoti o Pisinisi.

E le galo le tapuaiga a Samoa i Tama ma o latou Aiga, le usoga ia Tumua ma Pule, Aiga i le Tai ma le Vaa o Fonoti.

E le galo le faatalofa i le afaigaluega a le Atua i totonu o Samoa, faamalo le tatalo ma tapuai, o mana o a outou tatalo lea ua fifilemu ai Samoa. Malo le faitaulaga.

E faatalofa atu foi i o tatou uso i Sasae i le afio o le Kovana ma le Sui Kovana, le Fofoga Fetalai o le Maota, Sui o le Faigamalo a Tutuila ma Manua. O le paia lava lea aua Sua ma le Vaifanua, Fofu ma Aitulagi ma le Launiu na Saelua ae tainane le Tootoo o le Manuatele.

Le tapuaiga a le tatou Itumalo Gagaifomauga 2, tapuai maia se i fai so tatou sao i le tamaoiga o le atunuu lea ua i luga nei o le Maota. O ou tama faaleagaga i lou Itumalo, faamalo le tatalo, faamalo le tapuai. Faafetai mo le Tala o le Tupe 2023/2024. O le mea moni lava, e le tuulafoaia e le Atua Lona nuu. O le tele foi o tala faapea ua leai se tupe, ia o lo latou lava lea finagalo, ae o le mea moni e foi a le Viiga i le Atua i Lona alofa ma lona agalelei ia Samoa, lau Afioga i le Minisita o Tupe sa taumate i liu taumate i le ete lenei faamoemoe, po o le a se ituaiga Tala o le Tupe o le a vaevae mai ai le tamaoiga o Samoa. E manatu foi o lea lava ua opea i le Maota saunoaga ma tuleiga a le Maota nei aua le fitaituga o lau Afioga, ae tainane foi le Ofisa Sili o Pulega o le Matagaluega ma i latou uma sa fitaituga aua le tau faamaopoopoina o lenei faamoemoe. E fulisia le Maota i lagona o le fiafia ma le faagaetia aua le faapolokalameina ma le vaevaina o Tala o le Tupe 2023 a Matagaluega taitasi o le tatou Malo.

O le mea lea e momoli atu ai le agaga o le faafetai a lenei foi usugafono ma lenei itumalo e ala i le Tala o le Tupe o lenei tausaga. Ona matou manatu lea, sagai ane ai o le tai i lau Afioga i le Tamaitai Minisita, ae tainane o le Ofisa o le Tupe i ona tulaga faalupe aua Samoa mo a taeao. E i ai nai vaega e fia faamamafa, i se lagona ma se manatu a lenei Itumalo.

O le vaega muamua, lau Afioga i le Minisita matou te manatu a ua tele saunoaga ma tuleiga o lenei vaega o le taeao, ao lauga foi ma finagalo a Itumalo taitasi e ala mai lupe na faia mai le fuifui o lo o laulua fesilafai i totonu o lenei Maota. Ae a faapea ua ausia le \$1 piliona, aua ne i o tatou neenee ai ma o tatou mimita ai, ae tatou faafetaia le Atua i Lana pule faasoa ia Samoa ma o outou aao ma lima o le Kapeneta ua mafua ai ona ausia lenei Tala o le Tupe maua. O le matou tatalo ia tutumau ai pea ma ia agai i luma le faamoemoe aua Samoa mo a taeao.

Lona lua, maua foi e lenei usugafono ua i ai se vaegatupe aua totogi o tagata faigaluega. Se o le aua ia o mea. Aisea? Leaga o se taitaliga e tagitagi i taliga o lenei sui usufono, siitia, siitia totogi o tagata faigaluega. Ae faafetai faafetai tele i le faatofalaiga lea ua oo i ai se faautautaga mamao. Ua talafeuga lelei ma le faigata o le soifuaga ua tatou i ai lenei vaega o le tausaga e le faigofie le tausiga o Aiga, Nu'u ae tainane le galuega paia a le Atua. O le

mea lea e momoli atu ai le agaga faafetai i sea vaegatupe ua faaagaga mo tagata faigaluega a le Malo.

Lona Tolu lau Afioga i le Fofoga Fetalai e tauala i le Afioga i le Minisita atonu ou te lauga soo ai i mea nei o aitalafu a le tatou Malo. E faalogologo ma le totoa lea ua agai i lalo le faamoemoe. Atonu o le isi tupe faasao lea a le tatou Malo pe a na leai le totagiina o tatou aitalafu. Sagai ane ai o le tai totagi faamaeaea ia vaega ona toe afua ai lea o se isi taeao fou.

Lona fa o vaega lau Afioga i le Minisita o Tupe, o se vaegatupe foi lea mo e le atoatoa le malosi. E manatu o lenei Itumalo e i ai tagata o lenei Itumalo e aafia i aafiaga tumau ia, ma o le mea moni lava ma se faafofoga a le Maota, o ai na iluilu ma talutalu e uu e nei tagata soifua e le atoatoa le malosi se \$100 i le masina. Viia le Atua nai so o se mea i manatu sa faatulai ai lenei faamoemoe, aua foi nei tagata o le tatou atunuu. Ia o le agaga o lenei sui tatou amata ai i i, a aulia lea tausaga ia taoto atu le faamoemoe pe faaopopo, tatou alualu ai pea faapea. Ia, o se tala lea lau Afioga i le Minisita o Tupe tusa ai ma le faamoemoe, sau se taimi ou toe oo atu i lau Afioga.

Ia, lau Afioga i le Minisita o le Siosiomaga, e le toe tau tau atua ni manaoga o lenei Itumalo ua uma ona fofola i le amataga. Na ona matou toe tuitui ma tuutuu atu i ou autafa nai taligalu a le matou Itumalo na o le lua lava Nuu na o Matavai ma Fatuvalu. A silasila i ai lau Afioga, a oooo le tai e oo lava le sami i le auala. Na ona ou faapea atu ma tuutuu atu i ou autafa, fua i ai lau faasoa i le mea o lo o i lou aao.

Ia, ona ou oo mai lea i lau Afioga i le Minisita o Galuega Tetele, lau Afioga Olo. E momoli atu le agaga faafetai o lenei sui usufono i le \$10 le pasese o le vaa mai Savaii i Mulifanua, Mulifanua i Savaii, leaga e feoi lava Savaii i aso uma o le mafuaaga lea o le agaga faafetai i le faataugofieina o femalagaiga a Savaii i aso uma e ala lea i le \$10 ma le \$5. Ia, matou te le selu atu ua e masani i aso faapenei. O oe o le tautai o aso leaga i aso faapenei e momoli atu le agaga faafetai.

Ona matou oo mai lea i lau Matagaluega lea EPC, lau Afioga i le Minisita na oo atu lau Matagaluega i Komiti Faapalemene o Tulafono Tumau a le Maota ma o lo o ou nofo nei i Vaitele-fou ma ou te lagona o Vaitele Fou ma Vaitele Uta na fai ai le faataitaiga lea o le smart meter. Ma ou te amene atu i totonu o lenei Maota, afai e pe lau moli ua uma le paoa ae e toe sau i le faleoloa e totagi le \$10 tala tala faataitai, e te toe oo atu i lou maota toe \$8 ma sene le mea la e totoe. E mafai ona aumai faamaoniaga o le tala lea e fai atu, e ala i lisiti matou te totagia i le faleoloa o i ina lea e fua atu ai sa matou faamatalaga. Na ona toe tuutuu atu i autafa i lau Afioga i le Alii Minisita a o le matou fesili, o fea lea e alu i ai le \$1 ma sene po o le \$2 ma sene lea a o lea e pe le paoa? A o le faamamaavega mo le 20% lea na e tuuina mai i le atunuu viia le Atua i so o se mea i lau pule faasoa. Ona matou oo atu lea i le vaega lea.

**Tofa Hon Olo Fiti Afoa Vaai (Minisita mo Galuega, Felauaiga ma Atinae Eseeese):** Lau Afioga i le Fofoga Fetalai...

**FOFOGA FETALAI:** Malie le sui usufono mamalu ona o lea ua taua le EPC o le Matagaluega a le Minisita o Galuega Tetele lau Afioga i le Minisita.

**Tofa Hon Olo Fiti Afoa Vaai:** Ia, faafetai i lau Afioga i le Fofoga Fetalai, faafetai foi i le sui mamalu i lona finagalo faaalia. E puupuu a sau tali i le tulaga lea lau Afioga i le Fofoga Fetalai, ona o mea foi ia o smart meter e allow lava lou faaaogaina foi lea pe a faapea ua uma lau \$10 faataitaiga. E uma le \$10 e allow lava lou faaaogaina o le meter aemaise lava le tulaga o le po, masalo la pe alu ai i ina sau \$2 po o ua ova foi le faaaogaina. A e agai la e toe faatau se isi au \$10 ona otomeki a lea ona aveese mai e le metre le \$2 lea ua ova ai lou faaaogaina o le eletise o le po, aua e le o toe tatalaina ni ofisa. Ina ne i meaane ua misi ai le vaai a le tatou atunuu i le tulaga lena, e alu foi au i le smart meter, e faapena la le tulaga aemaise a weekends, e faapena lava ona ola lau paoa, pe \$2, \$3, \$4. Ae a oo loa i le taimi pe oo mai le Aso Gafua e te alu faatau le isi au \$10 e otomeki a ona aveese e le masini po o le smart meter le mea lea sa ova ai le faaaogaina.

Ae pei o nai vaega na ae manaia le taoto mai pea o lea lava e faaauau ai tulaga o galuega a le tatou EPC e siaki pea, ona e i ai foi nisi o vaega e le o atoatoa ai le auaunaga a le tatou smart meter.

O le faataitaiga lau Afioga i le Fofoga Fetalai, e i ai mita a faapea ua alu alu ua blank foi lea le tulaga o le mita a o la e ola lava le eletise a le aiga. O nisi na o faafitauli o lo o faafeagai ma tatou i le tatou system lea o le smart meter, ae faamalulu atu i le sui usufono ma le faafogafoga foi a le tatou Palemene, o lo o faatino lava le galuega a le tatou EPC e silasila totoa i tulaga ia o lo o aliae mai i le faaaogaina o le smart meter. Ma le faaaloalo.

**FOFOGA FETALAI:** Ia, malo faafetai lau Afioga i le Minisita. Ia se i tulai mai le sui faaauau le saunoaga.

**Tofa FOISALA LILO TUU IOANE:** Ia, e le faataumatatao i le saunoaga matagofie a le Afioga i le Minisita, a o le lagona a ia o lenei Itumalo ma lenei sui usufono leaga o le mea o la e tupu, pe le paoa uma ona totogi lata \$10 i le faleoloa ta te oo atu i le fale ua leai se \$1 ma sene pe \$2 ma sene a o la e sa pe le paoa.

Ona ou oo mai lea lau Afioga i le Minisita, e i ai le pa paipa o lo o puipui ai le aega tele o lo o i le matou nuu i Lefagaoalii. O lo o lelei le paipa a ua pala pou. Na ona taoto atu i tafatafa o lau Afioga. O manatu a ia o lenei sui usufono leaga sa lavevea ai taavale i le vaega lea. Atonu o lena e silafia e lau Afioga pe a oo ina e taamilo atu. O lo o lelei paipa pe a nei ma se 20-30

tausaga a o pou laupapa 10 x 10 o pou na ua faaletonu. Na ona tuu atu i tafatafa o lau Afioga e fai i ai le fuafuaga a lau Afioga.

Ia ma le mulimuli, o le isi au Matagaluega lea o le Vai. Atonu sa oo atu foi i le matou Komiti o lea e faafofoga mai le Komiti o Tulafono Tumau a le Maota. Sa ou fesiligia ona e i ai nai aiga o lenei Itumalo i Lefagaoalii e le i oo lava i ai le suavai. O le tali, e matautia le atamamai o Inisinia ia la a aumai. Lau Afioga i le Minisita ou te oo atu i le Aso Faraile na tea nei, e leai lava se suavai. O le mea lea na ona tuu atu i tafatafa o lau Afioga, e leai se isi e tauagavale i galuega fai a le Matagaluega, ae na ona tauologologo ma tuutuualalo i autafa o lau Afioga e fua ifo i ai lau faatatau.

Ia, ona ou oo mai lea i le vaega mulimuli lau Afioga i le Fofoga Fetalai, o le felautoaina o le tatou miliona. Lau Afioga i le Minisita o le miliona ae tainane foi le lagolagosua a le Minisita o Tupe e ala i le faasoasoina, se ua faafetai tele lava. O lea e faalogologo mai lou itumalo faatoa uma ona tufa le 314 ifiafi, 314 uilipaelo, 314 fagavao, o la ua tuu atu i outou aao aua le avagalima o le avagato a le tatou itumalo ina ia taofi ai ma ia maua ai taumafa mo aso uma. O le agaga faafetai lea a lenei Itumalo. Le paia i le affio o Sao e Fa, Affio le Nofo a Usoalii le Aiga Sa Peseta, alaatai le Falefa o Samauga, Susu le Tagaloasusu faapea lo oulua Toalua ma Sa Oloapu, alaatai foi le Toafia o Tulafale. O mamalu na o le tatou Itumalo. O lea ua outou faafofoga mai i le leo o le auauna o le sa outou filifilia aua Tiafau nei. O lenei ua faataunuu atu le tatou faamoemoe e pei e ala i le tatou \$425,000 lenei ua uma ona faatofutofusia ai le tatou Itumalo. O lea ua ou faaleoa le faafetai i le Minisita ma le Malo aua lenei faamoemoe, ni galuega fita ma ni galuega tauatia e a le tatou Itumalo, ia onosai mai ma tui mai le mulipapaga se i taumafai atu le isi tatou faamoemoe o lo o totoe nei ona atoa ai lea o le tatou miliona e tasi. E momoli atu le agaga faafetai i lau Afioga i le Minisita o lo o nafa ma le faamoemoe, leaga sa tele foi i ai tala ma faamatalaga. Ae viia le Atua o lea ua afa e tasi le Maota nei ua lagolagoina lenei faamoemoe.

Ona faaiu lea o se faamatalaga a lenei sui usufono i lau Afioga i le Minisita o Tupe, e matauina ma le totoa e lenei sui usufono le vaega lea i Vaimea o lo o agai i ai taavale ia a Matagaluega, o pikiapu o van, so o se ituaiga taavale a le Malo. O le tuualalo a lenei itumalo, o le a le mea e le faamatuu mai ai taavale ia e faatau e fono faavae aua a latou asiasiga. O le tuualalo lea a lenei itumalo i sina tau mama e gafatia ma gafataulimaina e itumalo e alu ai a latou asiasiga. O asiasiga o lo o fai nei, ia e pule lava le tagata ia i lana taavale e hire e le... ia, o upu foi a le atunuu e pule lava Sitafine i le la o lona vaa. A fai mai lava e fia \$100, e fua i le leaga ma le mamao o avagato a nuu taitasi. A o le tatalo lea a lenei itumalo ma lenei sui usufono, ae a pe a faamatuu mai hillux lelei la ou te vaai i ai i gauta aua itumalo taitasi.

Lau Afioga i le Fofoga Fetalai, ia o se lagona vaivai lea o lenei itumalo. Afai e paopapa i sa outou faafofoga ma se tou faalogologo, ia, e matua atu i

totonu o le Maota nei. O la matou tatalo, ia alualuai le tofamama i lau Afioga i le Fofoga Fetalai, lagisoifua le Tamaitai Palemia ma le Aiga Minisita. Maualuga le la Itu o le malu i le afifio mai o alii ma tamaitai faipule, maua se manatu i Ofisa Sili o Pulega o Matagaluega ae tainane Pisinisi Tumaoti aua le tautuaina o le Maota Fono o Samoa ma ana galuega fai.

Lau Afioga i le Fofoga Fetalai, o se tala lea a lenei itumalo. Ia manuia le Palemene o Samoa, manuia Samoa ma lana faafogafoga mai. Soifua ma ia manuia.

**FOFOGA FETALAI:** Malo faafetai, malo saunoa i lau Afioga i le sui usufono mamalu mai Gagaifomauga 2, po o lau Afioga foi i le Minisita Lagolago o le Soifua Maloloina. Malo faafetai mo le saunoaga, aemaise foi o nisi o manaoga o le itumalo e fia faaleleia, ia atonu o lea ua faafogoga ma le totoa le paia o le Kapeneta, aua lava le agai i luma ma le soifua manuia aua lava le agai i luma o le itumalo. O le mea lea malo faafetai mo lou sao i le tatou Tala o le Tupe.

Ia, o lo o avanoa le tatou Maota mo se saunoaga. Ia o lea ua fou mai le sa o le sui usufono mo Falealupo, lau Afioga i le Minisita Lagolago o Fesootaiga. Ia, tulai mai lau Afioga.

**Afioga FUIONO TENINA CRICHTON (Falealupo):** Faafetai ua maua se avanoa i lau Afioga i le Fofoga Fetalai, aua foi lenei taeao matagofie. O lena ua afio le Afioga i le Tamaitai Palemia, le Sui Palemia ma Afioga i Minisita o le Kapeneta, aemaise foi o Minisita Lagolago. Ia, le la foi Itu o le Maota aua le afio o lau Afioga i le Taitai o le Itu Agai, afifio Afioga i sui usufono o le Palemene o le Malo o Samoa, ae tainane foi o le paia maualuga o le Maota aua Ofisa Sili o Pulega o Matagaluega a le Malo o lo o tautua i le ao ma le po ona o le tulaga mamalu o le faatinoga o latou foi tiute faifaipea.

Ia, afio foi le tapuai mai o le Afioga i Le Ao mamalu o le Malo, le Sui Ao, aemaise foi o le Vasega o le Ofisa o le Faamasinoga Maualuga, aua Samoa ma ona Tulafono.

Ia, o sa le avea na o lenei taeao, faapea foi si o tatou atunuu mai le Matasaua seia paia Fili ma Puletuu na tauilo ai manu o Malo, ia o lea ua atoa i le taeao lenei. Malo faafetai.

O le tulaga lava o le Tala i le Tupe, leai ua faalogo ma le totoa, a o le i faia se faamatalaga a le sui usufono o Falealupo, aua foi le nofo tapuai mai o le afio o le Tupu Faanofonofu aua le Afioga ia Auvaa ma lona usoalii, Maopu o Nafanua ma le Matua ia Lamositele. Se alaafaga o lo latou Toafa ma Sili laei ma le mamalu o le tapuaiga.

Fai ai ia o se leo o le tatou itumalo aua le Tala maeaea o le tatou Tupe aua Samoa ma lona faafogoga mai. Ua malo faafetai ua taliga foi e fialogo lenei aso ona o sausaunoaga a sui usufono ua mafai ona momoli manatu ma



manao aua foi tulaga o lea itumalo ma lea itumalo. Ia, o Falealupo lava ia, na o ia lona itumalo. E talitonu foi, e le lavelave, e le faigata ona o le silasila lea leaga e tasi le tapuaiga ia Samoa, aua upufai o le atunuu. O lenei la vaega o le taeao, e taumafai ai so matou taofi, ona o mea lelei ua tatou tilotilo i ai, aua le afuafua maiga o lenei foi Tala Autu o le Tupe mo le 2023/2024.

Lau Afioga i le Miinsita o Tupe, malo faafetai, aua o lau Afioga o Sa Laulu ma Suafa, Faatoafe, o le nuu e faigata, ia ma le mamalu o Salemuliaga. O le taua o lenei vaega o le aso, ona o lea ua manino, tilotilo ma vaai i le faagaioiga o mea uma o le Malo, e leai o lo o lelei ma taua le faatinoga. Mataaala i ina, mataala foi le Ofisa o Tupe i o latou foi tiute e manaomia ai mea lelei, faatino mo a taeao aua le tatou atunuu. O le tatalo foi a lenei itumalo, e le tele lava ni mea o lo o manaomia, ae talitonu so o se mea lava o le atunuu e i ai le tamaoaiga, e tataua lava ona oo i ai alatetele, auala e faaogaina, aua lona atinae ina ia matua mausali lona lelei, le faagasologa o fuafuaga i lea itumalo ma lea itumalo. O le ala lea o le tatalo i le Afioga i le Minisita o Galuega Tetele a le Malo, ia o auala lava, leaga ua tele foi le afaina o auala ua toe faapooa ona ua mamafa tele timuga i Salafai. O si o matou afioaga, ia e le tau fai atu, atonu e i ai se taimi oo atu foi le Minisita ma silasila, ia e le sese le tatalo a le sui usufono o le itumalo o Falealupo i ona auala.

E pei o le naunautaiga lea o le au galulue ina ia lelei. Ma ou te talitonu foi i le malosiaga o fuafuaga i nei mea o aualagalue, e ao lava a faatino, e ao lava ona faata, ona umi lea o lona faaogaina, i lo lenei mea o le le faatino ae toto timuga le aoga uma. E manumanu ai i le taimi o le aufaigaluega e faatino ai. Agai mai i se isi fuafuaga i totonu o le tulaga o lo o i ai nei le vaitau ma le fegasoloaiga i lea afioaga ma lea afioaga, o le mea lava lea o lo o manaomia. Faafetai o lea ua tele ina maea galuega a le tele o itumalo, o le mea sili lena faafetai. Ae tatalo pea lenei itumalo o Falealupo, ina ia silasila ane lau Afioga i le Minisita, o le a se taimi o le a faatino ai lenei faamoemoe, ae faapena pea ona tatou felogonai.

Lua o le isi vaega taua, ona o lea ua tatou i luga o le faamaeaina o le poloketi o le \$1 miliona muamua. Faafetai i lau Afioga i le Minisita o Tina ma Tamaitai aua tulaga matagofie o lenei vaitau. E ese ai le manao o Falealupo i le toe tupe lea ua aumai ona ua tilotilo foi lenei nuu, ua ola tele kamupani tetele nei o lo o i ai i le atunuu ona o le poloketi lenei a le Malo. Aua foi e alu uma le tupe i faleoloa, a o la e fia maua sina seleni e o tatou nuu aua lona faagaioiina i fesoasoani, e fai o le toatele o e gasegase, toatele e mamai, ia aemaise foi o tulaga o nuu taitasi ma tulaga e faapena i le tilotilo i ai. Ia a alu atu nei le moavao, alu atu le tele o meafaigaluega, ia e i ai e aoga i ai. Ae a avatu lava le moavao e leai se isi o le aiga e faaogaina aua o la e ua tufa i aiga, ia ona taatia ai lava lea. Ae a maua sina tupe e faapena ona tufatufa atu, ia o se mea lelei tele mo le aumatutua nofofale, ia ma le au galulue, e utu ai foi nisi o penisinisi ma mea faapena, aua le taumafaiga ina

ia lelei le atinaega o galuega fai a le Malo. A o le lagolago ia ma le faafetai i le \$1 miliona, leai o lea ua manuia mea uma i fuafuaga a o le toe asaasa atu lena o le lagona o Falealupo ia, ia ona o le tulaga lava lea o lo o tilotilo i ai. Ia e tai fia ai e tai fia selau afe a tupe maua a nei kamupani malolosi o le atunuu ona o tulaga ia.

O se isi o vaega, e faafetai foi i lau Afioga i le Minisita o Galuega. Ia o tala lava o Alo le matagofie o mea uma, leai se mea o faaletonu. Ae manatua foi, e leai lava se faiva e sii e leai sona maumau, ioe. E leai foi se taaloga e leai sona lape. Leai aua le te'i lau Afioga i le Minisita, leaga o i ina e tauai atu i ai e tagata lelei ma leaga, ae alu lava le galuega ia, e le o mafai ona tuua.

O le tatalo a lenei nuu o Falealupo i lau Afioga, ona o oe o le Minisita o Faiga Faiva, o Falealupo e leaga tele le vaa e faaoga e vaa e fagotaina le sami. A o lea foi nuu, o se nuu lava o le tamaoaiga i tulaga o i'a o le sami. Ia, e tau faasaosao i tai se vaa vaetu le faafogoga mamalu a le Palemene. E tau faasaosao i tai toe tau faasaosao i uta, ia o isi lava taimi ua alu atu goto ai i le ava, ona taumafai lea e toe taumafai mai i uta, ae o le lagona lea e tuu atu pea i tafatafa o lau Afioga i le Minisita o Faiga Faiva lea talosaga mo se ava e taumafai ina ia lelei. E aoga foi a i ai nisi o le atunuu e fia o atu e fagogota i Falealupo, a o la e ua lelei le ava e nonofo ai ma mafuta ai aua mea nei o le suega o le tamaoaiga o si o tatou atunuu. O mea taua ia o lea e tilotilo i ai i vaega uma nei.

Ona ou oo mai lea i le vaega o le Soifua Maloloina.

**FOFOGA FETALAI:** Ua ou vaelupeina le saunoaga a le sui usufono mamalu mai Falealupo, talu ai o lea ua tataou taunuu mai i le taimi o le tatou malologa masani o le taeao. O le a faaauau lau saunoaga pe a tatou taliu mai.

Ia, e faataatiaese Galuega a le Fono Aoa mo lana malologa masani o le taeao.

*Na faataatiaese Taualumaga o le Fono Aoa Faitulafono mo lana malologa masani i le itula e 10:45 i le taeao ma toe faaauau i le itula e 11:16 i le taeao.*

*Na toe faaauau felafolafoaiga i luga o le Tulafono Tau Faaofi o le Faatatauina o Tupe 2023/2024.*

**FOFOGA FETALAI:** Ou te faasilasila atu ua toe amatalia nei Taualumaga a le Fono Aoa Faitulafono. Faamalo le onosai i le paia o le tatou Palemene ma le tatou Maota. I le taliu mai ai o le tatou malologa, e i ai le manatu ua maua se faasiligamalosi ina ua maea paleauau le taligasua e

ala i le taumafataga o le taeao. E le faaitiitia lava lo tatou faafetaia o le Atua i ana faamanuiaga e ala i Lana foai i lea aso ma lea aso.

E faataatiaese a tatou Tualumaga mo le malologa o lo o saunoa le sui usufono mo Falealupo. Ia, ou te tapa ma le faaaloalo lau Afioga i le sui usufono mamalu, faaauau mai lau saunoaga.

**Afioga FUIONO TENINA CRICHTON:** Faafetai ua maea le faasiligamalosi o le Maota aua lenei aso ma lona faamoemoe aua lana fonotaga. O lo o taumafai se lauga i nai mea o lo o totoe, aemaise foi o le tatalo na taatia mai ai i le Afioga i le Minisita o le Soifua Maloloina, aua lenei foi vaitau ma tulaga o lo o i ai. Faafetai ua le o toe... e ui lava i le faamai o lo o i ai nei o le flu, a o lea lava ua togafitia lava ma lelei fuafuaga aua foi le Faatonu o le Falemai ma tulaga o Ofisa ma... ae faapea lau Afioga i le Minisita. O le tatalo foi a lenei nuu, o lona ua uma ona oo atu i ou luma, ae toe faamanatu aua e le tau siligia ia te oe le tulaga o Falealupo ma lona mamao. O le tatalo ona ia mafai ona maua sina faamamaavega mo lo matou itumalo i le taumafai mai lea i tai i le aai i uta i le falemai tele i Sataua, sina falemai laitiiti e fua ai le fiva, maua ai le fualaau, tulaga faapena e maua ai vailaau, e faafaigofie ai, ae seiavagana ai loa se gasegase ua masii lona tigaina ona sii loa lea agai i uta i le mea o lo o i ai le falemai faaitumalo. E pei o nai tatalo lea i lau Afioga aua lenei foi nuu o Falealupo ma le tulaga o lo o i ai lona taumamao, ia ma le mea o lo o i ai le tatou falemai tele. O le tatou falemai, leai o lea o lo o asi asi pea i ai o lo o sologa lelei mea uma, leai se mea o faaletonu o lo o i ai foi le tatou foma. Ae na pau lava lona o le tatalo a lenei nuu o Falealupo, silasila ane lau Afioga ia maua lava sina fale e faatau ai vailaau ma fua ai le fiva ma tulaga faapena, e faafaigofie ai le feoai mamao mai. Ia ua faagata ai i i lea vaega.

O le talosaga i taavale ia ua maea atu le Minisita Lagolago, ae faapena foi le lagolagoina e lenei nuu o Falealupo. E taua tele lea vaega ea ua laga mai e le Minisita Lagolago, aua taavale nei o lo o taumafai ina ia faaoga i le atunuu, aemaise foi o le tatou Maota, aua le faagaoiina ma le faaogaina i galuega fai. Ia, o se mea silisili lea ona taua, ona faaoga ai lea e maua ai foi se tupe aua le faaalualuga o galuega, aemaise o totonu i le faalotoifale.

O se isi vaega o lau tautalaga, e leai, e le mafai ona tuua le tulaga foi o le tapuai mai o lou itumalo o Falealupo ona o nisi o lafoga o lo o i luga nei o le vanimonimo i tulaga o mea nei o afioaga ma nuu. O Falealupo, ia, o se tasi lava o faifeau faapea o le nuu o temoni Falealupo. E leai o lea ua lauga sao Fuiono, o le ala lea o le valoia o le talalelei i Falealupo, faagata ai i i tulaga faapea, aua, aua ne i toe i ai ni lafoga e iloa mai ai o la e lava e feoai ma temoni tagata. Ae o Falealupo, leai o le nuu o tagata soifua o lo o tautua le galuega a le Atua. O le mea lea e fia faasao, e leai ni temoni o i Falealupo.

**FOFOGA FETALAI:** Ia, ou te fautua atu i le sui usufono mamalu, talu ai ona o tatou Tulafono Tumau, e i ai lava le liolio foi i mataupu ua lagalaga, ae atonu e i ai se taimi e foia ai le faafitauli o le tou itumalo, a o le agaga lena o le Nofoa.

**Afioga FUIONO TENINA CRICHTON:** Ioe lau Afioga i le Fofoga Fetalai, e leai e le faia so matou loto, ae ona o mea ua alu i le vanimonimo ua faigata tele ia te au ona toe apo mai e pei o lea vaega taua aua lenei aso.

Faafetai i le Minisita o Aoga ua matagofie foi le tulaga o le faagasologa o aoga aua lau galuega o lo o taumafai nei. Ia e leai lava ni manatu o i matou o lo o sologa lelei foi le matou faleaoga, o lo o lelei mea uma i le faagasologa. Faafetai foi mo le asiasiga talu ai ua toe vaavaai ai Falealupo i lau Afioga ua leva foi ona tatou tete'a. O le mea lena e faafetai atu ai i lau Afioga i le Minisita o Aoga, aua lenei aso.

Aemaise foi o le Minisita o Fesootaiga, malo i le taua foi galuega, ia, o lea o lo o manaia lava mea uma, e leai se mea o faaletonu ma afaina, o lena le galuega fiafia aua le tatou galulue faatasi mo le agai i luma o si o tatou atunuu mo lona lelei.

Faafetai i lau Afioga i le Sui Palemia mo ou foi tiute faatino aua totonu o le malae o Samoa, o le malae lava o le faautugatagi i le Atua ina ia maua se lelei mo a taeao aua le tatou taimi o lo o tatou nofoia.

Aemaise foi o lau Afioga i le Minisita mo Leoleo ma Falepuipui. Malo faafetai o lo o manino le vaai i tulaga maopoopo o mea lelei, faatino. Ia ua tele le tiute lena ua avatu e faamalosi le Tulafono, aua loa le toe foi, fai loa ina ia malosi ma mausali le tulaga mamalu o le Ofisa. Ia o lena le agaga fiafia ma le faafetai aua lenei aso ma le faamoemoe.

Ia lau Afioga i le Fofoga Fetalai, ua maea foi le leo o lenei itumalo o Falealupo. Ia faamanuia le Atua i lau Afioga i le Nofoa aua le tauaveina o le Fono a le tatou Palemene aua lenei faamoemoe o le Tala Autu o le Tupe. E lagolagoina malosi e Falealupo. Manuia le aso.

**FOFOGA FETALAI:** Malo faafetai saunoa i lau Afioga i le sui usufono mamalu mai Falealupo, o lau Afioga foi i le Minisita Lagolago o Fesootaiga ma le tatou Ofisa o le Fono. Malo lava. Faafetai mo lou sao.

Ia o nai mea o lo o tutupu i lou itumalo, ia taatia atu lava i lau Afioga ma nai au faifeau ma le tou itumalo ina ia faapena ona liuliu ifo ina ia faapena ona maua ai le toamalie o le itumalo. Ae faafetai mo lou sao, aemaise foi o nisi o mea o lo o manaomia e le itumalo lea ua faafofoga atu ma le totoa le paia o le Kapeneta. Malo faafetai.

Ia, ua avanoa foi le tatou... e le o toe toatele ni tatou sui usufono... Faafetai. O lea ua tulai mai le sui usufono o Sagaga 2, tulai maia lau Afioga i le sui usufono mamalu.

**Susuga MAULOLO TAVITA AMOSA (Sagaga 2):** Faafetai mo le avanoa lau Afioga i le Fofoga Fetalai ua malie pule malie le faafofoga ma le faalogologo i upu foi o le pese na fai ma folamua foi o le tatou Fonousu i lenei taeao. Ua soona olioli lo'u loto ia Iesu, ia aumaia na upu e tatou te tiu ai faalatasi ina ia malu pea le faatofalaiga i lenei Maota aua se lumanai manuia o Samoa tainane le tapuaiga a le atunuu. Ua maea ona faatulima ma faatalofa foi e le gata i le Fonousu nei, ae faapena foi le tapuaiga a le atunuu. Ta faoliu ia i lou sa, ona e manumanu foi i le tatou taimi.

Ae o lenei ituaso, se i taumafai atu se tuualalo foi a le sui foi o le afioaga i Malie, le afioaga i Afega ma le afioaga i Tuanai, o Sagaga le Usoga lava lea aua le Nofoalii a le Malietoa. I le matau atu i le Tala o le Tupe ma finagalo e tele ua faaalua ua matagofie. E tau tomanatu ma mafaufau po o fea le mea e aumai ai se sao o lenei itumalo ina ia fautele pea lo tatou sa aua le manuia o Samoa a taeao.

Lau Afioga i le Fofoga Fetalai, o lea ua tatou talanoaina nei le Tala Faatatau o le Tupe mo le tausaga lona tolu lenei o lenei Paeaiga, o le ogatotonugalemu lenei o tausaga e 5 o le tatou Paeaiga Lona 17 a le Palemene. Ona manatu ai lea i le faalogologo atu foi i sou vaivai ma finagalo ua faaalua, atonu o se avanoa lenei tatou te asia po o fea ua lele i ai lo tatou sa, po o ogatasi le futia ma le umele ma tulaga i le tofa sa faataoto ma mamamu ai fuafuaga a lenei Palemene mai le tausaga muamua, lea ua tatou agai atu i le tausaga lona tolu i le ogatotonugalemu.

O le uiga o lau faamatalaga, e manatu lou nei sui usufono, o se avanoa manaia lenei se i tatou toe asia le Pathway for the Development of Samoa. O fea o taoto ai la tatou faasoa i lenei tausaga faaletupe o le seleni, ma tatou fuafuaga pei ona manino ma faataatia taiala aoao aua le lumanai o Samoa.

Lau Afioga i le Fofoga Fetalai, e manino lelei, o mea ua ave i ai le faamuamua i mea nei e tolu, lea ou te fia amata ai sau faamatalaga, o priorities areas nei. Muamua, o se fesoasoani ina ia faamama le mativa ma le le tagolima.

O le faamuamua lona lua, o le auunaga faa-soifua maloloina ia siitia pea lona tulaga lelei.

Ma le faamuamua lona tolu po o le priority 3, o tulaga tau aoaoga, siitia pea a tatou aoaoga i tulaga lelei. E pei o nai faamuamua na se i amata atu ai se vaivaiga foi o le sui usufono o lenei itumalo. O le tatou sa e fautele, avatu aumai. A uma foi ona avatu sa matou tuualalo, ia ona taoto atu lea i ina e filitagaga i ai le tofa i le tatou Malo, ae matou tuualalo atu ma faufautua.

O le vaega lea se i tau faatulaga e fesoasoani i le faaitiitia o le mativa ma le le tagolima. Ua manaia ma matagofie le fuafuaga lea, tatou atinae lea \$1 miliona e fesoasoani mo lea vaega. Peitai, e le vave ona fua mai lea vaega. Pe 1, 2, 3 tausaga faatoa fua mai, aua e faalagolago lava po o a atinae lea o le a agai e faaaoaga i ai lea maau o le atunuu.

A o le mea lea ou te fia tautala i ai, ou te fia tuliloaina lava mea na faaalua e nisi o sui usufono. E mafai ona tau fai sina faamamaavega, se subsidy tau o mea o lo o manaomia lava, basic food item. Sa ou lauga muamua ai foi i lea tausaga i le tulaga leni. O mea ia e manaomia, nai taumafa ia e manaomia i aso uma, nai vailaau mo le fanau, mea foi aua le tumama e pei o latou pampers ma napkins, ma e faia lelei lava le vaega lea ma se isi foi o tulaga o lo o faataatia mai le vaega lea o le soifua maloloina, ina ia faafualoa le soifua o le tagata.

I le faitau atu o le Lipoti a le Bureau of Statistics i le faaiuga lea o le kuata lea na maea nei ia Mati o le 2023, faafetai viia le alofa o le Atua fai mai ua sosoo nei le fa o kuata ua tualga siitia pea le tupe maua aemaise mai le vaega lea o lafoga. Ma e le tau selu atu, ae faafetai atu i le Afioga i le Minisita le Sui Palemia, le Tamaitai Pule, le Pulega ma le Matagaluega o Lafoga i le latou mataalia ma le mataala ua matauina ai pea le siisii alu maualuga, ma ua sili mamao atu tupe na mafai ona latou aoina mai mai le latou target. Lea foi sa ou tau ane i le latou Lipoti Faaletausaga, ia sa au lava i se tulaga mitamita faia'e ina ua silia i le miliona le tupe na latou maua mai i le isi tausaga lea ua ou le maua lelei le Annual Report pei lava o le 20/21. Lea la ua matau atu ai le siitia pea o a tatou tupe maua. E faamata e le'o se avanoa leni tatou te taumafai ai e toe seu silasila lava i le, *Priority muamua; faaitiitia le tulaga lea o le mativa ma le le tagolima*".

O se tasi foi mea ua tulai mai ua tatou molimauiina le taugata o fua o faaeleeleaga i le maketi. A tagai i le Lipoti a le Central Bank, na amata lava ona siitia le tau o mea ia i le tatou maketi lava i Samoa nei na amata mai i le iuga o le tausaga talu ai. Ae na matua matauina le oso i luga i le masina o Ianuari ma sau ai lava ia Fepuari ma Mati.

O le uiga o la'u faamatalaga o pine faamau ia o le siitia o le tau o a tatou fua faaeleeleaga i le maketi, ae e aoga sina faamamaavega e faaitiitia ai le mativa ma le le tagolima mo i latou o nai aiga e le'o i ai ni tagata faigaluega.

Ia, faafetai foi mo lea faamamaavega ua agai atu i ai i le tulaga lea o le siitia o totogi o tagata faigaluega, leaga o a'u le isi sui sa laga tele le mataupu lea i le tausaga talu ai o lea ua tali mai le manao. Ae na o nai mea a ia o basic food items o lea e faapea e aofia uma ai tiute o isi mea, ae e pei o nai mea lava ia e manaomia, aemaise foi lava le tausiga o le fanau laiti, o susu ma mea faapena ina ia mafai ona fesootai ma se tasi o faamuamua o lo o sau i lalo o le vaega o le soifua maloloina. E pei lava ona ou fola manino atu, o le tuualalo lava ia e auvatu a o lena e ina le tofa aua foi la outou faaiuga mulimuli.

O le tulaga la i le fesoasoani lea o le tamaoaiga o fua o faatoaga...

**Susuga Hon Laauli Leuatea Polataivao Fosi:** Lau Afioga i le Fofoga Fetalai..

**FOFOGA FETALAI:** Malie le sui usufono mamalu se i tuu atu le avanoa i le Afioga i le Minisita o Faatoaga ma Faigafaiva

**Susuga Hon Laauli Leuatea Polataivao Fosi:** Faafetai mo le avanoa. O si mataupu lava lea ua ou manatu e le tatau ona tuua e tatau ona faamalamalama, leaga ua tele saunoaga ua tulai mai, “ua taugata le soifuaga ona o meaano”. O lea foi ua sau le Lipoti mai ia Ianuari e tau mai i le taimi lenei ua taugata le meamata i le maketi. Ae tatau ona faamalamalama e lua itu. O le saunoaga lena a i latou o lo o e faatau. Ae o le tali a le aufaifaatoaga ua manuia le aufaifaatoaga. E i ai le mafuaaga ua mafua ai le tulaga lea mai lava ia Ianuari e tau mai i le taimi lenei, ua siitia le tulaga o le auina atu o tatou fua o faaeleelega i fafo. Sa tatou talanoa nei na o le tai sefulu container i le masina a o lea ua lalata nei i le 20 container lea ua ave i le taimi lenei a tatou talo. Tatou talanoa la i le talo. O le mafuaaga lena o lea ua iai le taimi lenei lea foi ua saunoa ai nisi ma tau le upu lea oge. O le manaomiaga ua faatuputeleina i le atunuu ma atunuu mamao i le maketi lea e auina atu i fafo lea tonu a ua e saunoa i ai lau Afioga i le sui usufono. O le tau o le pusatalo sa tatou i ai i le amataga o le tausaga e \$60.00. O le taimi lenei ua \$80 - \$90.00 la ua faatau mai ai le 22kilo mai le aufaifaatoaga. O le uiga tonu lava lena lau afioga i le sui usufono lea e uunai atu ai nei tatou polokalame lea e auvatu o le toe faatupulaia, toto ia lava, fai ia mau, ma ia lava taumafa i le atunuu. O le fatu lena o le mea lea sa faatavale atu nei i le tatou Uluai Seleselega foi ia e faitio mai ai nisi o outou. O le aano atoa o le mea lea e tupu nei i le tau faavasegaga o le tulaga o le tupe maua ma le manaomia tele, o le faamanuiaga lena, a o la e faafofoga uma mai tatou maketi i Amerika, tatou maketi i Hawaii, tatou maketi i Niu Sila, Ausetalia, Amerika Samoa ma le lalolagi atoa ua mafai ona ave i ai tatou talo. O le tuualalo lena o lea e fai i le aufaifaatoaga i le taimi lenei. O le a le mea e fai? Ia malilie Samoa le aufaifaatoaga uma tatou o tatou galulue i le vao ina ia lava taumafa i le atunuu.

Afai la o i latou nei ua faapea mai ua amata ona taugata meamata i le maketi, malilie o le taimi lenei o le seleselega mo le au faifaatoaga. A o le tagata lava ia a le manao e faatau lana talo a maua sona taimi avanoa agai e agai e vaai lana pupu talo i le mea la na te silafia fanua e agai i ai. A o le agaga lena ua ou manao e faamalamalama i le taimi lenei, o le aano lena o le mafuaaga o le siitia o le tau o fua faaeleelega i le taimi lenei ona ua manaomia tele. Ae lua vaega o le itu e manaomia toe tele ai tupe a le aufaifaatoaga.

O le agaga lea lau afioga i le Fofoga Fetalai ua ou manatu e tatau ona faamalamalama ne i te i foi ua toe tu ae se isi avesese le tulaga ua leai ni meamata, ae o le tulaga lautele, ua manuia le aufaifaatoaga i lenei vaitau ona o le manaomia tele o fua o faaeleelega. Ma lo’u agaga faaaloalo.

**FOFOGA FETALAI:** Ma saunoa lau Afioga i le Minisita. Ia lau afioga i le sui usufono mamalu.

**Susuga MAULOLO TAVITA AMOSA:** Ia lau afioga i le Taitaifono, faapea au o le mea lea e saunoa i ai le Afioga i le Minisita o le mea lea ou te taumafai atu ai. Ae ui i lea e leai o le mea lava e tasi, ae pau le mea ou te le i taua se oge po o le a, ae pau le tulaga o indicators ia e sau mai le Central Bank, ua fai lava si alu i luga o le tau o le maketi. Ae o mafuaaga, e le i faapea na paia i ai se leo o le itumalo lenei. O la e silafia e tofua lava le tagata ma lana faauigaga po o le mea ua tele le demand ae laitiiti le supply. Ia o tulaga o mea faapena.

Ae o le tulaga lea i le faasoaga o le tatou seleni i le matau atu e pei ua lava lea faaopoopoga ua ave i ai i le Matagalega o Faatoaga ona o le tulaga lea o lea e mamafa i ai ma lilifa i ai le faamoemoega mo le faaitiitia o le mativa ma le le tagolima". Ia na ona faataatia atu o lea lava e avatu le tatou tuualalo aua le agai i luma.

O le tulaga lea i le isi Priority lea i le tulaga tau soifua maloloina. O le manaia ia ma le matagofie o folasaga o lo o i ai i le tatou Tusi Taiala Aoa lenei, i le taumafaiga foi o le tatou vaitaimi i lenei Paeaiga i taumafaiga a le Malo ina ia taumafai e siitia pea auaunaga ia mafai ona maua uma e le atunuu le tulaga o le faaleleia atili o le soifua maloloina. Ia se i silasila ane lava lau Afioga i le Minisita o le Soifua Maloloina e auala atu i le Fofoga Fetalai aemaise foi le o lo o taulamua i le faasoaga o le tatou seleni i tulaga o vaialau ma mea faapena.

O lo o i ai foi nisi o faasalalauaga foi a le Matagaluega aemaise foi o nisi o auaunaga e pei e foliga mai o le a agai atu i le vaega lea o le Private Sector. O le popolega o lo'u nei sui afai o auaunaga ia sa faatino e le Matagaluega o le Soifua Maloloina sa fai fua po o se tau taugofie lava ae a fai loa i tulaga faapea o le a see ese o lona uiga o le a oo i se tulaga o le a siitia le taugata, ona toe seu silasila lea. O upu a le atunuu, se i seu a le manu ae tagai i le galu, se i silasila ane lava i mea ua uma ona tatou faataatitia o a tatou Taiala Aoa lea, pe faamata o se faiga lea o le a gafataulimaina e le limavaivai i ia tulaga faapea. Ia e pei na ona tuu atu lava i autafa aemaise foi le vaega lea, o lea e vaai atu i mea o falemai faapitoa specialist, o Clinic Specialist pe faamata o se avanoa lelei lea aua o lea foi sa i ai o latou tomali faapitoa e faatino nisi o auaunaga ua le mafai ona faatino i le taimi lenei ona ua utiuti le aufaigaluega.

O se tasi tulaga foi sa faatino e le Vaega lea o le Matagaluega o Tina ma Tamaitai, polokalame lea o Aiga ma Nuu Manuia. Ia ona o lea ua matau atu ua amata ona faaseetuagalu lea vaega, pe a matau atu i le faasoaina o le tatou seleni. Ae tasi lea polokalame ou te molimauina e matagofie sa faatino i afioaga taitasi aemaise lava le tulaga o le tumama, mo le faaitiitia lea o



faamai pipisi ma faama'i le pipisi, e fesootai uma lava i le fatuaiga tausi a le Matagaluega o le Soifua Maloloina.

O se tasi o mea lea o lo o matua faamamafa mai lava i le tatou Taiala Aoaotetele lea, o le a taumafai lenei Paeaiga ina ia siitia tulaga o le maua o vailaau ma fualaau mo togafitiga i tua i Maota Gasegase Faaitumalo. E pei lava ona ou fai atu i la'u folasaga muamua o lea ua tatou agai i le Tala o le Tupe 2023/2024 o le ogatotonugalemu o lenei 5 tausaga. O lea foi la ua ou manatu ai i le vaega lea, ia na ona toe faamanatu atu lava sei seu silasila ane lava i le tatou faasoa. O le mea lelei le maea ane o le tatou 5 tausaga ma o tatou faapea ane faafetai ua tele ina ausia mea sa tatou tuuina i lalo e mulimulitai i ai le tatou faasoa mai lea tausaga ma lea tausaga e pei o le agaga lena o le tuualalo.

E le gata i lea a silasila i le Priority 13; "O le siitia o le atoaga o galuega fai a le Malo". Improved Accountability. O le tulaga masani lava o auaunaga a le Soifua Maloloina o le a lava le taimi o le aso, o le ao ma le po e i ai lava le auaunaga. Ia na ona tuu atu lava i tafatafa foi o le Afioga i le Minisita se i silasila e le'o toe po se lilo i le tulaga foi ua tulai mai i le afaigaluega, nei meaane nei aveave ae fai ma auala e ponaia ai lea vaega o tatou faamuamua o le priority 13 lena ina ia siitia galuega fai a le Malo, aua e accountable lava le Matagaluega po o mafai ona faatino ana matafaioi sa masani ai.

O le Priority lona tolu po o le faamuamua lona tolu, "O le tulaga tau Aoaoga lelei"...

**FOFOGA FETALAI:** Ia malie le sui mamalu se i tuu atu le avanoa i le Afioga i le Tamaitai Palemia, ia lau afioga i le Tamaitai Palemia.

**Afioga Hon Fiamē Naomi Mataafa (Palemia):** O le mea e fia faamalamalama faafetai i le sui usufono o lo o saunoa, e taua le mataupu lea i le Matagaluega o le Soifua Maloloina, ma tau faaataatagia mai ai nisi o faatalanoaga foi pe a i luga o faasalalauga eseese e faasino lea i le afaigaluega a le Matagaluega o le Soifua Maloloina. Atonu e i ai se taimi ona tali lea o le Afioga i le Minisita ae mo lenei taimi e ao ona ou faailoa atu i le Maota, atonu o lea tatou te manatua o le Matagaluega lea sa tuueseese e Pulega o Faiga Faavae ma Auaunaga lea na toe tuufaatasi foi i le tau faaiiuga o le tatou Paeaiga talu ai. Ma ou te manatu o le vaega lea o lea e tupu mai ai le tulaga o lea e faasolo nei ia le faatalanoaga mo totogi ma ovataimi, ona o le Pulega talu ai sa i ai na latou faatulagaina le tulaga o totogi ma ovataimi. I le toe faafoi mai i le tuufaatasiga ma toe fai mai ai i lalo o le PSC, o lona uiga ua taoto le afaigaluega a le Soifua Maloloina i lalo o Faiga Faavae ma Faavaa o totogi o tagata faigaluega a le Malo. O fesuiaga la ia o lea ou te manatu o lea e mafua ai, a o lea lava e lelei le faagasolosolo, ae ou te manatu e taua lo'u faailoa atu o le mea lea ina ia nofo silafia ai le tatou Maota. O lona uiga o le eseese o Pulega. O le mea talu ai sa i lalo o le

Auaunaga a le National Health Services e mafai foi ona tatou faapea o se Faalapotopotoga Tumaoti a le Malo, ae ina ua toe tuufaatasi ua see mai loa i lalo o le Pulega a le PSC o le vaaiga la a le PSC e tataua ona faatulaga uma tagata faigaluega a le Malo i le faavaa ma faiga faavae o lea e galue ai le tatou Komisi o Pulea Tagata Faigaluega a le Malo. Ma lo'u faaaloalo lava.

**FOFOGA FETALAI:** Ia malo faafetai lau Afioga i le Tamaitai Palemia. Atonu o lea ua māūa mai e le sui usufono mamalu, ia faaauau lau saunoaga.

**Susuga MAULOLO TAVITA AMOSA:** Ia faafetai tele lava i le Afioga i le Tamaitai Palemia mo lea tulaga. O lea foi ua faafofoga mai le tatou Itumalo aemaise foi le toatele o outou le itupa o Tina ma Tamaitai ia aua laia le popole ae onosai mai ma tapuai mai o lea lava o lo o faasolosolo tulaga o feutanaiga faapea mo le manuia ina ia aua ne i taunuu le mea lena tou te atugalua mai ai. A o lena ua outou faafofoga mai o lea ua ou lagā i totonu o le Maota ia faafetai lea ua to so outou matupalapala ia ua saunoa mai le Afioga i le Tamaitai Palemia e faamalamalama lea tulaga.

O le vaega o Aoaoga, ia o le a le agai sau upu i le Primary ma le Secondary sa tele i ai sau lauga talu ai, ae pei e agai i le Vaega lea o le Tertiary aemaise lava le Iunivesite Aoa o Samoa. E pei ua tau matau atu e pei ua tau fai sina tele o tulaga lea ua faaititia ai foi le faasoa mo i latou. Ae o le tatou tulaga o lo o i ai taiala aoa ina ia faatumaui lava i se tulaga lelei tulaga tau aoaoga.

O le popolega o lou nei sui aua a alualu loa ua le lava le faasoa i luga i Aoga Mauululuga pei o le Iunivesite, ia e lua a mea e tua i ai, o le toe si'i lea e latou o pili aoga ia po o le tulaga foi lea e ono faaluafesasi ai ma compromise le standard o aoaoga. Ae a silasila la lau Afioga i le Fofoga Fetalai ma le mamalu o le Fonousu i lena taeao o lo o i ai le tatou priority numera 5 le tatou faamuamua tulaga ia o lo o faapea; Tulaga mauuluga ma tomā ma agavaa o tagata faigaluega. E fia maua se aufaigaluega faamoemoeina, agavaa ma lava le tomā. Ia o fea le vaega o le Malo tatou te tua ma faamoemoe i ai? Ia, o luga i le Tertiary level, luga i Iunivesite ma tulaga faapea tatou te faamoemoe i ai. E pei lava ona ou fai atu o le agaga lava ia o le tuualalo ia na ona toe faamanatu atu mea ua uma ona mamānu e le tatou Faigamalo ma lo tatou taimi e limataitaiina ai tatou galuega fai aua le lumanai manuia o Samoa.

O le tulaga i le faamuamua lona 4 po o le Priority 4, o le faaaupegaina lea o tagata i avanoa mo le soifua manuia. Ma o se tasi o expected outcomes na e i ai i taunuuga o lo o faapea mai, ia siitia avanoa mo tagata uma aemaise Tina, Tamaitai ma Tupulaga Talavou. Ou te fia faatepa se i taga'i le tatou Fonousu i le upu lea "Aemaise, aemaise Tina, Tamaitai ma Tupulaga Talavou". E pei o le fatuaiga tasi lea e fitoitonu i lalo o le Matagaluega lea o Tina ma Tamaitai ma Agafesootai.

Ia o le fesili, ua matau atu lava pei ua le toe atagia mai le matua tauave a lea Matagaluega i Tamaitai i ana nafa foi ma ana fatuaiga tausī e masani ai. Faafetai o lea ua vaai atu ua i ai se faasoā i tulaga o a latou falelalaga. Ae o le Vaega la lea o le Tupulaga Talavou pei o lea lava ua vaavaai atu pei ua ou le maua po o fea tonu la ua i ai le vaega lea aua e i ai foi Tulafono e faasino ia i latou. Poo fea tonu la le matagaluega o nafa foi ma tatou polokalame aua le Vaega o le Tupulaga Talavou ina ia ausia foi lea vaega o a tatou priorities lea o lo o faataatia mai. E le gata foi i lea pe mata o lava le tatou faasoā i tulaga e faafaigaluega ai ma faatino tulaga ia o le tatou Matagaluega lea e tusa ma nisi o Maliega Faava-o-Malo ua maea ona sainia e le tatou Malo pei o le CEDAW, CRC, ia ma mea faapena. Ia na ona matou faufautua atu lava ma toe tau faamanatu atu lava nei mea uma ina ne i mea lava ua se'e lo tatou sa, ae...

**FOFOGA FETALAI:** Toe tolu minute o le sui usufono.

**Susuga MAULOLO TAVITA AMOSA:** Sole, ia se i tau vaavaai atu po o fea ni mea e ofi atu i lenei taimi lau Afioga.

O le tulaga la lea i le Priority 16 po o le faamuamua lona 16 lau Afioga mo le Siosiomaga, lea o lo o faapea mai, taumafai se tulaga faava'a mo le puleaina...

**FOFOGA FETALAI:** Se i fesili atu lava i le sui usufono mamalu, o le a ea le mea lea e te faitaua mai? O le tatou Tala o le Tupe po o le...

**Susuga MAULOLO TAVITA AMOSA:** Lau Afioga, e leai o lea ou te tautala, lauga faalauaitete i le tatou Tala o le Tupe pe tutusa ma mea ia ua uma ona faataatia e le Malo.

**Afioga Hon Lautafi Fio Selafi Purcell (Satupaitea):** Lau Afioga i le Fofoga Fetalai...

**FOFOGA FETALAI:** Ia, e i ai a le manatu o le Nofoa o lea lava ua uma ona saunoa le Minisita ia ma ta'ua ai foi Faiga Faavae a le Malo, ia pei o le tulaga lena. Sa fa'ita e te fautua faalauaitete ia a o lea ua matau atu ia o lea ua auiliili taitasi mai ia Faamoemoega ma Faiga Faavae mo le lumanai o le Atunuu, ia e pei e faapena le agaga. O le faitauga faalua lava ia o le tatou Tulafono ia lauga faalauaitete ae aua le auiliilia taitasi mai. E pei o le tulaga lena e faamanatu atu pea i le sui usufono mamalu.

**Susuga MAULOLO TAVITA AMOSA:** Faafetai.

**FOFOGA FETALAI:** Ia, e faamanatu atu le Nofoa ina ne i te i ua fenunia'i le Maota i ia vaega ua e saunoa i ai e pei o le agaga lena e fautua atu ai pea le Nofoa.

Se i tulai mai le sui usufono o Satupaitea.

**Afioga Hon Lautafi Fio Selafi Purcell:** Faafetai lau Afioga i le Fofoga Fetalai, manaia ia o le lafolafola a le sui usufono o Sagaga atonu foi e faamalamalama atili ai nisi o finauga o lo o fai nei, ia ma uiga toto'a o lo o tatou tilotilo ai i le tatou Tala o le Tupe.

Ae ua ou tu atu e faatu se lafo, *E faaopoopo nisi minute se 5 mo le sui usufono mamalu e faauma mai ai lana saunoaga matagofie.*

Ma le faaaloalo.

*Faaluaina e le sui usufono mo Gagaifomauga 1 ma le sui usufono mo Vaimauga 1.*

*E le i tuuina atu le Maliega Autasi a le Maota i le lafo.*

**FOFOGA FETALAI:** Ia finagalo malie le sui faauma maia le saunoaga.

**Susuga MAULOLO TAVITA AMOSA:** O le tatou lava galuega e faapena tatou te o lava i le faiga o Tulafono Tumau. Ia o le mea sili foi la e faafofoga mai lo'u Itumalo. Ia malilie ia le tatou Itumalo ia ua lamalama faaiu foi se faamatalaga.

O le mea la lea e tataua lava ona ou aveatua i tulaga ia o le Puipuiga o le Siosiomaga, faasoa faamolemole. O le matou Itumalo lea pei ua aveeseina uma foi faleaoga mai Tuanai ona ua afa le malae ona lofia i le suasami. Ia faapena foi i Afega ma Malie, o nuu ia o le tele o le nuu e mafuli i tai i le aai ma tulaga faapena. Ia se i seu silasila ane lava i ai lau faasoa faamolemole.

Ia ma le mea mulimuli lava, o tulaga foi e i ai i le tatou faasoa aua foi le inisiuaina o tatou aseta tetele a le Malo, e le o toe po se lilo e taua lea tulaga tele afa ma suiga o le tau e ono aafia ai a tatou aseta tetele ma tulaga faapea.

Ia ona faauma atu ai lea o se faamatalaga. Ia faafetai tele lava mo lenei Tala o le Tupe e lagolagoina foi e le Itumalo. Ae po o le a foi nei tulaga o le Tala o le Tupe faapea ae a tatou le mataalia faatasi ma le afaigaluega i le pulega e monitor ma fai le evaluation, ia, e ono fesiligia lava se taunuuga lelei o nei mea uma. Aemaise o lenei, a le maua le filemu e Samoa e afua atu i le Maota lenei, o le faigata ia ona faatino a tatou atinae. E pei o le tulaga lea e faauma atu ai sa matou lauga a lenei Itumalo, ae momoli atu le faafetai tele.

Faafetai foi i le Afioga i le Tamaitai Palemia ma lona Auvaa, ia so o se mea fou lava e tele lava foi luitau ma tofotofoga, ia ae lototele ma ia onosai. E faapena foi ia lena itu o le malu ma lenei itu o le malu, ia o le matou lava

galuega ma le matou fatuaiga tausī o le tuualalo atu ina ia tasi i tatou ma tatou folau faalatasi i nei tausaga o totoe foi o le tatou Paeaiga.

Ia o sa matou faamatalaga lea, i le Suafa o le Tama ma le Alo ma le Agaga Paia, Amene.

**FOFOGA FETALAI:** Malo faafetai, malo faasoa i lau Susuga Tumua le Afioga foi i le sui mamalu mai Sagaga Nu.2. Faafetai mo lou sao. Ia e aoga foi a nai fautuaga faalauaitetele, ia o lea foi e faafogafoga mai le Kapeneta aemaise foi o le aufaigaluega aua lava le faagasologa mo le agai i luma o le atunuu. O le mea lea, malo faafetai, ia ua maua le avanoa mo se tasi o sui usufono.

Ia lea ua sauni mai le sui usufono mamalu mai Gagaifomauga Nu.1. Tulai mai lau Afioga i le sui usufono mamalu.

**Tofa Hon FAIMALOTOA KIKA STOWERS-AH KAU:** Ia, faafetai lau Afioga i le Fofoga Fetalai mo le avanoa o lenei usugafono mai Salafai. E momoli atu foi le agaga faamalo i lau Afioga i le faatautaia foi o le tatou fonotaga aemaise foi le taimi e siisii ai finagalo o sui usufono e le faigofie, malo faafetai. E faatalofa aloaia atu ai i lenei itula i lau Afioga i le Fofoga Fetalai.

E le gata foi i lea ua maua lenei avanoa e faatalofa atu ai i lau Afioga i le Tamaitai Palemia, lau Afioga i le Sa'o Faapito ia e faapena foi le Aiga Kapeneta, le Saofaiga a Minisita Lagolago.

Ia taliu mai foi i lenei itu, e faatalofa i sui usufono mamalu uma o le Palemene o Samoa. E faatalofa atu foi i le tapuaiga faafogafoga mai i Lana Afioga i Le Ao Mamalu o le Malo ma le Masiofo, e le gata i lea o le Sui o le Fono a Sui Tofia ma le Faletua.

E faapena foi se faatalofia i le Afioga i le Faamasino Sili ma le Ofisa o le Faamasinoga. E faapena foi ona faatalofa atu i le faafogafoga tapuai mai o si o tatou atunuu pele o Samoa i ona tulaga faalupea. E le gata i mamalu faale-atunuu, o paia faale-Malo ae faasilisili i paia faale-Talalelei.

E faapena foi ona faatalofa atu i le paia i le faafogafoga tapuai mai o nai o tatou uso i le Motu i Sasae aua Tutuila ma Manua.

E faatalofa atu foi ma ofo alofa aloaia i le tapuaiga a le saofaiga a Ofisa Sili o Pulega o Matagaluega ma Faalapotopotoga a le Malo ua mafai ona tatou faatasi i lenei itula o le aso, faamalo le galulue, malo le onosai faafetai le tautua atunuu.

E faapena foi ona faatalofia atu i lau Susuga i le Failautusi ma lou auvaa, Failautusi Lagolago ma le Ofisa o le Fono o lo o faapena ona tautuaina le Fonousu a Samoa i taimi uma e usu ai le Fonotaga, malo le galulue.

Ia, ma lau faatalofa mulimuli i le faafogafoga tapuai mai o si ou Itumalo pele o Gagaifomauga 1 i le Motu tele i Salafai. Ia o paia lava lea aua le Afifio o Sa'o e Fa, Aiga Sa Umalau, le Atipouniu ma le Faasau, le Alaalatai o lau

Fetalaiga i le Tulafale lau Tofa Lavea o oe o le Alii o le Itu, o oe o le pule na muaimalae. Ia e faapea foi le nofo a ituaiga ia Safotu.

Taliu mai i si o matou nuu i Manase. E faapena ona faatalofa atu i le Susu o Taito ma ona Alo ae le gata i lea o le Fetalaiga i le Tauasa. Ia ae faatalofa faapitoa lava i le faafogafoga tapuai mai a le afaigaluega tofofi a le Atua o lo o faapena ona nonomanu i le ao ma le po aua se manuia o le Itumalo, malo le tatalo malo le tapuai.

Ia tapuai maia ae se i taumafai se tatou faamatalaga e tusa ai foi o le Tala Autu o le Tupe ua i luma nei o le Maota.

Lau Afioga i le Fofoga Fetalai, nei ou laaloa, ae galo ai ia te au le faafetai mai a si ou itumalo i le Afioga i le Tamaitai Palemia mo lana Saunoaga Faaminisita matagofie. E le oo i ai sau faamatalaga aua o lea ua taatia i luma o le Maota, ae o le faafetai a si ou Itumalo o lea ua tau faapulapula atu ma tau faamanino atu le tele o vaega lea sa felafaoi ma gugulu ai i mea na tutupu talu ai nei, ia la ua tau maua mai ai so latou malamalama, ia malo lava. E le gata i lea e momoli atu le faafetai a lenei itumalo i le afioga i le sui usufono mo Vaimauga 3, i lau saunoaga matagofie, faataupou. Ia o ou mama na, o oe foi o se tasi na faapena ona tautua aua si o tatou atunuu i taimi ua sola.

I te i ua galo ia te au, e faafetai atu i lau afioga i le Minisita o Tupe, aemaise le Ofisa Sili o Pulega, le Pulega ma le Matagaluega o le Tupe, aua le tuu faatasia o lenei Tala o le Tupe 2023/2024, e pei ona opea nei i le Maota.

Lau afioga i le Fofoga Fetalai, ua maea foi ona saunoa ni sui usufono e faatatau i le Tala o le Tupe o lo o i ai nei, ae taua ai foi le siitia o le tatou tala i lenei tausaga ua piliona. E i ai foi si faapoopoga a lenei sui usufono i sui usufono ua maea. Ia masalo o galo o le 2021/2022, o lea sa...e talitonu e fautua mai le Ofisa o le Tupe, sa saunia ai foi e le Ofisa o le Tupe le tatou tala faatatau autu o le tupe, na oo foi i le piliona ma ona tupe le tatou tupe. Ae peitai ane o fesuaiga foi o Faigamalo, ma fesuaiga foi ua fuafua e lena itu i galuega faatino ma faataatitia, o fesuaiga na o numera na i ai, e ona ou faapena atu.

Lau afioga i le Fofoga Fetalai, ae ou te le i faia se isi faamatalaga, e na ona ou toe fia faamanatu atu i lena Itu, i le tatou Malo, aemaise o a outou afioga i Minisita...

**Susuga Hon Mulipola Anarosa Ale Molioo (Minisita o Tupe):** Lau afioga i le Fofoga Fetalai....

**FOFOGA FETALAI:** Ia malie le sui usufono mamalu, se i tuu atu le avanoa i le Minisita o Tupe. Ia tulai mai lau afioga i le Minisita.

**Susuga Hon Mulipola Anarosa Ale Molioo:** Ia faafetai i lau afioga i le Fofoga Fetalai mo le avanoa. Ou te talitonu e le na o le pau lea o le taimi na taua ai le vaega lea, e pei ona saunoa ai foi le Tamaitai sui usufono. O le

fesili, e pe na talanoaina le tala o le tupe lea e ova atu i le piliona i luma o le Maota o le Palemene, aua o mea aloaia ia. O le fesili lea lau afioga.

**FOFOGA FETALAI:** E masalo pe ua maua mai e le sui usufono, o le tau faamaninoina lava e le Tamaitai Minisita o Tupe, leaga o lea e fai ma oo i ai a tatou saunoaga i ia futia ua tuanai. Ae tatou talanoa i mea ua manino ma mea ua tuuina mai i le Maota.

**Tofa Hon FAIMALOTOA KIKA STOWERS AH-KAU:** Lau afioga i le Fofoga Fetalai, ia malo, ou te le o manatua lelei, a o lea sa i ai le tala o le tupe sa avatu foi ina taimi ina ua maea ona saunia e le Kapeneta ma tilotilo foi i ai, o le ala lena o le fai atu o se faamatalaga. E leaga o lea sa....ae o lea ou te le i manatua....e pei lava o lea na aumai, ae pei lava ona ou fai atu, e faasao mai au e le Matagaluega. Ae faafetai pe a fai o lea e ....ae o le tulaga lena, sa ou vaai au, sa i ai le tala o le tupe, na saunia e le Matagaluega o le Tupe, ae faafetai o lea e faamanino mai i le saunoaga a le Minisita o Tupe.

**Susuga Hon Mulipola Anarosa Ale Molioo:** Lau afioga i le Fofoga Fetalai...

**FOFOGA FETALAI:** Ia se i tuu atu pea le avanoa i le Minisita se o faamanino pea lau fesili.

**Susuga Hon Mulipola Anarosa Ale Molioo:** E pei o le mafuaaga lena o lou tulai atu lau afioga i le Fofoga Fetalai. Ua tatou masani i le tala faatatau autu o le tupe. E folasia i luma o le Maota, ma aloaia atu ai i luma o le tatou Maota o le Palemene. E pei o lau fesili tuusao lea, e talitonu e pe ua toa lua i le toa tolu a tatou sui usufono, na maua foi o latou finagalo o lea sa i ai le tatou tala o le tupe e ova atu i le piliona. Ae o le faafesili, pe na talanoaina ma aloaia i totonu o le Maota o le Palemene? O le fesili lea fia malamalama lau afioga i le Fofoga Fetalai.

**FOFOGA FETALAI:** Ia se i tulai mai le sui usufono o Faleata 4. E tea gai i le Minisita pe e te agai.....

**Tofa Ale Vena Ale (Faleata 4):** Ou te faauilavea i o i le saunoaga a le...e leai o lea e fia faamanatu atu i le saunoaga a le sui usufono lea. O le tala o le tupe lea e saunoa i ai Faimalotoa, o le tala o le tupe a matou, pe ana faapea matou te toe tutu mai, e 1.2 piliona. E pei o le tala lena ma le faaaloalo lava faafetai.

**FOFOGA FETALAI:** E fesoasoani atu pea le Nofoa, atonu ua maua foi foi e le sui usufono mamalu ia tulaga ia, e pei ua avatu le faafesili i lau afioga

i le Minisita ma la outou Matagaluega, ia se taimi foi saunoa lau afioga, ona faamanino lea o lea tulaga. O lea ua ou manatu, e pei o nai manatunatuga ma na foi taimi sa saofai ai i le Kapeneta. Ae o le auiliiliina ma le faamalamalamaina, o lau afioga i le Minisita o Tupe i se taimi.

Ia tulai maia lau afioga i le sui mamalu e faaauau lau saunoaga, ia see ese ia i piliona ma le tele o ai o fesili i lau afioga.

**Tofa Hon FAIMALOTOA KIKA STOWERS AH KAU:** Ia faafetai i lau afioga i le Fofoga Fetalai, e ala ona ..e leai se faatautee, ae pei lava ona ou fai atu, atonu e aumai se faamaoniga, ae sa i ai le tala o le tupe na saunia. Na sau loa outou i totonu, sui loa le tala o le tupe, o le ala lena o lau faamatalaga, e molimau mai le Ofisa o le Tupe e i ai le Tala o le Tupe na saunia ma sa ou vaai i ai. Ae o le a see ese.....

**FOFOGA FETALAI:** Ia malie le sui usufono mamalu... ia o lea foi ua toe tulai mai le Minisita e faamalamalama atili nei mea. Ia se i tulai mai lau afioga i le Minisita o Faatoaga.

**Susuga Hon Laauli Leuatea Polataivao Fosi:** O la e faafofoga le atunuu, a o la e molimau Samoa e tatau ona faasao uma a tatou tuleiga ma saunoaga. O lea ua saunoa malamalama le Minisita o Tupe, e leai se taimi, na laasia ai e le Malo o Samoa se tala o le tupe e oo i le mea lea. Ma o le mea lena e tatau lava ona faamanino. O lea ua saunoa manino le afioga i le sui usufono, o le tala o le tupe na fai i tua. Ua na o ni tala o le tupe na fai i tua ia outou fuafuaga na fai, ae le o se tala o le tupe a le Palemene. O le moemitiga na outou faia. A o le mea lea ua avatu, o le mea ua moni. O le mea moni lava lea ua avatu, o lea faatoa oo ia Samoa i le piliona. E leaga o lea e faalogologo lava, sa tupu i le matou taimi. E le i tupu i le tou taimi, o le mea lena e tatau ona faamalamalama. O lea la ua saunoa manino le afioga i le sui usufono, o nai a outou fuafuaga na outou taupule ai, ma tau ia Samoa. A matou omai i totonu, e tasi tesimale ova i le piliona. Ae e le i tupu, e le aloaia, e leai se tala o le tupe na faapena. A o lea la ua faamanino, ia...o lea ua avatu le faamoemoe o le Minisita o Tupe, lea ua taatia i le agatonu, o lea faatoa tupu i totonu o le tatou Faigamalo. Ma lou faaaloalo.

**FOFOGA FETALAI:** I aua i ai le manatu o le Nofoa, o le a see ese ai le tatou mataupu i le tulaga lea. O lea ua saunoa manino le Tamaitai Minisita o Tupe. O lea foi ua saunoa manino lau afioga i le sui mamalu, o lea ua tau atagia mai, e le o i ai se tulaga faapena. Ia tulai mai le sui usufono mo Faleata.

**Tofa Ale Vena Ale:** Lau afioga, ou te faamoi le saunoaga a le Minisita o Faatoaga, o le tala o le tupe lea e .....o le tala o le tupe na fai i o i Petesa, a



o lea ua...na fuafua i le Faigamalo lea a matou pe a toe tu mai. O lea la e le i oo mai i le [Palemene, e leai la se mea o le a lote ai fua le mea. Ia manuia tele lau tala o le tupe lau afioga i le Minisita o Tupe. Faafetai.

**FOFOGA FETALAI:** Lau afioga i le sui usufono mamalu, tulai mai lau afioga i le Minisita.

**Afioga Hon Valasi Luapitofanua Toogamaga Tafito Selesele:** O lea lava e numi i le faalogologo le tala o le tupe a le la Itu. Ou te iloa i lau matau mai i le taimi o faasalalau latou campaign o le tala o aitalafu, e 1.2 piliona. Ae le o se tala o le tupe autu, o le tala o aitalafu sa o latou faia. E pei o le faasaoga lea.

**FOFOGA FETALAI:** Ua i ai foi le manatu o le Nofoa, o le a see ese le tatou mataupu ma lagalaga nisi o finagalo. Ae o lea lava ua manino, e musu foi le Nofoa e tau faailoa atu, o lea ua manino i la outou faafofoga ia le faamalamalamaina o lena tulaga. E le mafai foi ona ou tuuina atu se fefinuaiga i le tulaga lea, leaga o lea e tuu le avanoa i le Malo, ina ia faamalamalama atili, a o lea foi ua talifuaitea mai ia nisi...ia se i tulai mai...o fea e te faauilavea i ai..

**Afioga Leaana Ronnie Posini:** Ou te faauilavea i le saunoaga a le Tamaitai sui usufono.

**FOFOGA FETALAI:** O le a le itu lea e te fia faauilavea ai...

**Afioga Leaana Ronnie Posini:** E leai o lea ou te fia faamalamalama i le Tamaitai sui usufono, o le mea lea o le tala o le tupe, e tausaga atoa o tapena. E le faapea e nofo ia Aperila, sui le faigamalo faatoa fai ai lea o le tala o le tupe. Na tapena le tala o le tupe, o lena ua outou silafia e tausaga atoa, lea e i ai le tala o le tupe lena e 21/22, e \$1.2 piliona. Ma le agaga faaaloalo.

**FOFOGA FETALAI:** E i ai le manatu o le Nofoa, ia lau afioga i le sui mamalu, ia see ese ia lou sa, faauau lau saunoaga i nisi o mea taua. Ia o lea ua manino lea tulaga.

**Tofa Hon FAIMALOTOA KIKA STOWERS-AH KAU:** Ia ua lelei, o le a ou see ese, a o la e silasila le Tamaloa la e i Luga, na saunia, ae ona ua fesui mai le Malo, na ua.....ae o le a ou see ese, ae pei o se tulaga lena e faapulapula atu...

**FOFOGA FETALAI:** Ia malie le ....se i tulai mai le sui tamaitai, po o le a se mea o tulai mai.....

**Afioga Aliimalemanu Moti Momoemausu Alofa Tuuau (Sui Usufono Tamaitai - Alataua Sisifo):** Lau afioga i le Fofoga Fetalai, o le mataupu e fia faamalamalama ma fia faasao i le saunoaga a le sui usufono mamalu. Ona o lea ua talanoa i mea ia i le tai piliona, mo lou silafia....e fia faamalamalama, o mea nei o tala faatatau o tupe, e na o mea o fuafuaga ma matematega. Ae so o se tausaga lava, e amata mai i le 1962, sei oo i le taimi e fai ai sou avanoa, ona ou faamatalaina lea. O le alu agai i luga, e tataua lava ona i ai siitaga. Na amata mai oo i le selau, oo i le fitusefulu fitu, faasolo mai. E oo mai i le tausaga lea na tea nei, e limasefullu ono pasene lea ua siitia ai. E so o se Faigamalo lava la, e masani ai matou nei accountants, ua leva ona tataua ona oo i le piliona le Tala o le Tupe. Ia o le faamalamalamaga lena, ae mo lou silafia, e leai e le o se mea e mimita ai se isi. O le me aua masani ai matou nei e tapenaina le Tala o le Tupe, ua tataua ona oo i luga, ua lua tausaga talu ai, sa tataua ai ona oo i luga. Ma le faaaloalo lava.

**Afioga Sulamanaia Fetaiai Tauilili Tuivasa:** Lau afioga i le Fofoga Fetalai o se mea e fia faamalamalama...

**FOFOGA FETALAI:** E te accountant... Ia lau afioga i le sui usufono mamalu, saunoa ia i se isi mataupu ma le tele o lou taimi alu.

**Tofa Hon FAIMALOTOA KIKA STOWERS AH-KAU:** E faafetai i lau afioga i le Fofoga Fetalai, e masalo o le tele lava o le pisa o lea lava sa fai atu la ta ita tala... ae o le a taatia ai faapea. O mea lava o taaloga faapolokiki e manao lava... ae o le tulaga lena na i ai.

Ia ae o le a muamua atu i se faamatalaga, e faamanatu atu i lena Itu ia nai manaoga o si ou itumalo, ua leva foi ona folasia ma talosagaina ae o lo o faatalitali pea.

Ia o le a ou amata atu ia i lau afioga i le Minisita o le Soifua Maloloina, ia o le taimi nei, o lo o faatali pea, e le i faia lava se fale o si a matou fomaia, ia e faapena foi le faaleleia o le falemai o le itumalo. E tolu itumalo o lo o serve i le falemai lea, lea e i totonu o Safotu, o Gagaifomauga 1, o Gagaifomauga 2 ma Gagaifomauga 3. E pei ona folasia i taimi ua sola, le la foi tausaga na tea nei. O le falemai lea sa o lava si o matou itumalo, aisi tupe fai ai le falemai lea. Ae na ona toe tuutuu atu, atonu o lea ua ou vaai i totonu o le Tala o le Tupe, o lea ua toe tuu le isi miliona, e pei foi o le miliona lea na... atonu o le miliona lea e toe faasoosoo atu ai falemai e le i oo atu i ai. O le fale la e nofo ai nei le fomaia, o le fale na i ai teine tausua soifua, e faatalitali ai pe a manava, e faapena foi ona omai faatali ai, pe a oo i le taimi e taunuu mai ai, seia oo i le taimi e momoli ai i le fale.

Ae lau afioga i le Minisita o Atinae Tetele, lau afioga Olo...

**Afioga Hon Valasi Luapitofanua Toogamaga Tafito Selesele:** Lau afioga i le Fofoga Fetalai....

**FOFOGA FETALAI:** Ia malie le sui usufono mamalu, se i tuu atu le avanoa i le Minisita o le Soifua Maloloina.

**Afioga Hon Valasi Luapitofanua Toogamaga Tafito Selesele:** O si mea laititi lava e fia faamanino, ne i mea ane ua faalogo sese le...aemaise foi e faafofoga sese lo tatou atunuu. O galuega ia e tau faatino atu, e silafia foi ua leva ona i le la itu le Malo. A o lea ua agai i le lua tausaga ma le afa le Nofoaiga nei. Ae sa tulai mai foi i le foe le Tamaitai sui usufono, sa tataua la ona faia mea ia i lona taimi, aua o tupe ua leva ona taatitia. Ae aua e te popole lau afioga, lafo mai lou faatuatuaga, o lea ua faagasolo a tatou fuafuaga, ina ia mafai ona faataunuu manuia. Ae o le a tali ootoo atu tulaga, ae na o le pau lava lea o le mea nei mea ane ua e mateletele, ma e talanoa mai, ia o vaegatupe nei, ia ua leva ona taatitia i ou vaitaimi ma... le fesuaiga foi lele o Minisita a le Soifua Maloloina. O lea faatoa tulai le Minisita e mafai ona faia, e pei o le agaga lea lau Afioga i le Minisita, lau Afioga i le Fofoga Fetalai.

**FOFOGA FETALAI:** Ia lea ua faafofoga mai lau Afioga i le sui usufono mamalu, ia, o lou avanoa lea e faamaea mai ai lau saunoaga, toe tolu minute o lau saunoaga.

**Tofa Hon FAIMALOTOA KIKA STOWERS-AH KAU:** Lau Afioga ou te le fia faatautee, o lena e silafia e lau Afioga ana o au o se tagata leaga i le taimi o ou tulai i le foe, e ave lau faamuamua e fau ai le falemai le la. Ae sa ou vaai le tulaga lautele e faasoa limalelei sa amata mai ai na faasolosolo mai ai Fomai i le faiga o galuega nei i le \$10 miliona lea sa maua mai fafo lea sa faasolosolo ai falemai e le gata i Upolu nei aemaise o Salafai. Ae o lea lava ua vaai atu a o le a uma uma atu lava le seleni, ia o le ala lena o le taumafai atu. Ia, si o matou Itumalo i le auala foi lea Olo e masani foi ona talatalanoa atu ai i lau Afioga. I le auala i Manase ae faapea foi le tolotolo lea i le va o Manase ma Safotu, masalo toetiiti lava tupu se faalavelave aemaise o le tulaga ogaoga o le tau i le tulaga lea ua i ai mafuie. E tu tele le auala ma o lena foi ua i ai le tupe e \$10 miliona na ua taatia poo tai lalata mai se taimi. E pule lava le faasoa a tou Afioga ae le gata i lea e faafetai atu lau Afioga ma le Pulega o le Suavai ua vaaia na ua amata ua faatino galuega mo le maua o se suavai mama mo si o matou nuu lea lata mai i Manase.

E faapena foi ona faafetai atu ai i le EPC lau Susuga i le Faauluuluga faafetai mo la lea galuega.

Ae faamanatu atu pea ia na foi ua saunoa i ai isi sui usufono i le pe soo o le paoa ua tele nai aiga e faapena ona faaoo mai ia latou TV, pusaaisa ma na, a

o le isi ua faaleagaina ona o le tulaga lea ae faamanatu atu foi mo mea o tatou poumulī auala matua pogisa lava totonu o nuu pe a oo nei ina timuga ma la, e tele ina pepe moli auala pe i ai sina asiasiga tai 3 tai 4 masina ma asiasi atu se i silasila i tulaga ia tau i le Eletise.

Lau Afioga i le Minisita o le Siosiomaga, e tuutuu atu pea foi i ou autafa...

**Tofa Hon Olo Fiti Afoa Vaai:** Lau Afioga i le Fofoga Fetalai .

**FOFOGA FETALAI:** Ia malie le sui usufono mamalu se i tuu atu le avanoa se i tuu atu le avanoa i le Afioga i le Minisita o Galuega Tetele.

**Tofa Olo Fiti Afoa Vaai:** Faafetai tele lava i le saunoaga manino a le Afioga i le sui usufono mamalu i le tulaga lea o le tatou auala. E saolele lava lau Afioga o lo o faagasolo i ai le feasibility study ma o le tatou \$10 miliona lea o le tupe o lea e faaagaaga mo tatou suesuega ona e le na o Safotu, o lea foi e fai ai le suesuega agai le Itu o Anoamaa i le tupe lava lea. Ae taunuu mai loa, a uma loa ua maea ae maua le tatou fund e faatino ai ona faapena loa lea ona faataunuu le tulaga lea.

E pei o le tulaga lea e tau faasao, ae faafetai tele lava i lau faamanuiaga ma lou agaga fialia i le tulaga o nisi o atinae ma galuega o lo o faatino atu i lou itumalo faafetai .

**FOFGA FETALAI:** Ia tulai mai lau Afioga i le sui usufono mamalu e faaauau le saunoaga.

**Tofa Hon FAIMALOTOA KIKA STOWERS-AH KAU:** E toe tasi a si galuega lea lau Afioga, e faamanatu atu pea o le auala lea e alu i Matavanu le mata o le afi, ou te iloa o lea ua tea ma le afa le faatinoina talu ai i le faigamalo talu ai. Ae fagufagu pea lau Afioga o se tasi lea o mataaga, e ono tele se fesoasoani aemaise foi le taumafai mai o le Ofisa o Turisi i tupe maua. O le tele o Turisi i le matou Nuu aemaise lo matou Nuu lea i Manase, e tiga ona palapala leai se auala tele e leai ni taavale ae tele ia o le turisi e lalaa i uta atonu o se faamanuiaga foi lena mo tatou aemaise foi tagata o si matou nei Itumalo.

E faauma atu ai manaoga e ui lava lea ua opea foi i Maota ma tele saunoaga e fai ai. Ae mo le atunuu femalagaai aemaise tatou mai Savaii, i vaitafe foi ia i Saipipi ma Lano e pei ona i ai e ave i ai lau faamuamua po o le a le fetuunaiga aua le atunuu femalagaai aemaise foi latou e pei ona talosaga o lo o alaala ai ae pau na o nai manaoga.

Ona ou oo mai lea lau Afioga i le Fofoga Fetalai, nai faafesili o lo o fiamalamalama ai lenei Itumalo amata mai o mataupu ua uma foi ona aumai totonu o le Maota, a o loo talia poo lea se alu i luma lea se update ua oo i ai. E fia malamalama lau Afioga ile Minisita o Vaalele poo le se tulaga ua iai le

alu i luma o le toe sailia mai o se tatou vaalele , e moi a pei foi ona saunoa le Minisita o lea ua tele mai Vaalele ma tele felelei ma tele na , pau a le mea le popole ma fesilisili ai tagata, tele vaalele ae ua tauagata a pasese , ua taugata pasese pei o le tulaga lena poo lea se tulaga ua iai . Ua inu uma e Niu Sila ma Ausetalia ma Fiti faamanuiaga ae a iai a se tatou a vaalele , tele a mea e mafai ona fesuiiai . Ao iai foi la i vaalele faamolemole taatia atu i le Faigamalo lau Afioga i le Tamaitai Palemia ma lena itu , poo iai a le tatou feagaiga faavaomalo ma Niu Sila le Treaty of Friendship poo lea se tulaga o lena tulaga ae sei tatalo atu pe iai se isi faiga , iai nisi auala tatou te tilotilo iai e faafaigofie ai le faiga o Visa mo nai tagata femalagaai , iai isi aiga talu ai nei uma lelei a na teu le latou maliu ma mea o faataasiga sa iai o faatali a ni visa. Faamolemole taatia atu lena foi itu sei silasila ane iai.

O le PSC e talitonu o le tele o le talanoa ma tagata faigaluega i le tele o Matagaluega o loo faaalua pea le latou naunau foi ua toagaogao tagata faigaluega ae ua tele galuega e tataua ona vave ona faatino e tali atu ai i manaoga o le atunuu poo ua tai oo mai se taimi e faatumu ai ia tatou avanoa foi nei ina ia faapena ona maua ai ni galuega mo nai tatou alo ma fanau sa invest ai le Malo foi mai a la foi lava e tau saili ni galuega, e pei o se tulaga lena .

Ona oo mai lea, faafetai tele lau Afioga .

**FOFOGA FETALA:** Faamaea mai le saunoaga a le sui usufono mamalu ua maea lou taimi .

**Tofa Hon FAIMALOTOA KIKA STOWERS-AH KAU:** Lau Afioga atonu o lea la , o le tele ia o nai mea ia leaga o le faalavelave uma o le au vaega ia i la ta pe leai se avanoa. Na ua silafia uma e le Moata le faafofoga mai se tamai taimi na faiatu ai sa ta tala ae tu mai luga .

**FOFOGA FETALAI:** Ia finagalo malie leaga o loo i totonu o Tulafono tumau, e aafia uma iai ia faauilavea ma fautuaga ma meauma lava ae faamaea mai le saunoaga.

**Tofa Hon FAIMALOTOA KIKA STOWERS-AH KAU:** Le tatou faafetai atu i le Minisita o Tupe mo le siitaga o totogi lea ua faataatia mai , o le fautuaga a lenei usugafono pe faapefea ona fai? Pe maua faatasi pe auauai poo lea se faagasologa o lea iai? O ai a ave iai le faamuamua ae pei o se vaivaiga a lenei usugafono pea saili ni auala foi nei ina ia faapena ona maua faatasi lenei ua leva ona faatalitali si afaigaluega . O le isi faafesili o le tatou mea foi lea o le forensic auditing o lea ua toe vaai lea foi ua toe tuu le isi miliona mo lenei tausaga faaletupe ae pe lea sa iai le 500 afe afa miliona mo le la tausaga pe tai lalata mai se lipoti oni mea ua maea ona suesue mo la lea tulaga.

Ona ou toe lua a nai ata... lau Afioga i le Minisita o Soifua Maloloina faamolemole nai faafesili i le tulaga lea nei mau tala feaveai solo i luga o Nusipepa, o le mea o upegatafailagi i le tulaga lea iai lea faapea o le aso toonai lea faatino ai. Faafetai lea e te saunoa manino na o mea moni e aumai totonu o le Maota, ae poo lea se faamalamalamaga o le popolega o lenei sui, faamolemole aua nei tutupu le mea o lea ua faapea amata i le 8 manava i le 4, leai se auaunaga i le Aso Toonai, leai se auaunaga i le Aso Sa faamolemole aua nei tupu ae o se fautuaga ae taatia atu pea i lau Afioga.

**FOFOGA FETALAI:** E fautua atu i le sui mamalu, o mea lava na o mea e felelei solo , tatou te le faaaogaina i totonu o le Maota pei o le faafesili lena lau Afioga aua nao le Maota lenei e tali mai aumai lea o le tali sao ona o lae talanoa ma popole si o tatou atunuu, faamalie atu ai lau Afioga e le faapea e leo se, ae na ona fia iloa ona ou te leiloa poo ai la tuuai ai pea tupu se mea faapea o tatou nei, o tatou nei o taitai o le atunuu.

**Afioga Valasi Luapitofanua Toogamaga Tafito Selesele:** Lau Afioga i le Fofoga Fetalai.

**FOFOGA FEALAI:** Ia atonu o lea la e faafofoga atu ai i le saunoaga a le Minisita , tulai mai lau Afioga.

**Afioga Valasi Luapitofanua Toogamaga Tafito Selesele:** E i ai a le manatu e sa aoao manogi o lauga ina ia mafai ona tali atu i le taimi e tasi peitai ua ou vaai atu i le sui ua tau tutulu le Sui Usufono, o oloa lea o iai ona popolega, Lau Afioga i le Fofoga Fetalai e oo mai a ile taimi lenei o le measili ona ou ofo ai, e iloa mai ia i latou tala nei ao le Minisita e ou le Matagaluega e leai se mea faapea ua oo mai ia te a'u a mea o le amata galuega i le 8 manava i le 4 sa ou le faalavelave foi i le faamalamalamaga a le Palemia. A ua uma ona taoto fuafuaaga a le PSC ma le Matagaluega ao lau tali atoatoa atu i se taimi ae aua e te popole , o loo iai a Mose ma le Au Perofeta aua o ituaiga ia e iai lau lauga o le lauga faaoloataua ia lagalaga ai finagalo ma manatu ua leva na ou polokiki , ua leva foi ona ou le maota lenei, ou te iloa lelei e aoga i le faafofoga ma lauga foi e lagalaga ai manatu. Ae o le tala moni e leai ma se mea ua oo mai ia te au e faailoa mai ai ni faiga faapena, o loo manaia le taotoga pau le mea na oo mai ia te au o le tali a le PSC tusitusia i taotoga o loo iai le aufaigaluega ma o le matagofie , leaga o na e te silafia lau Afioga tamaitai faipule , sa e seei foi i le Minisita o le Soifua Maloloina e moni lava sa faatino le me aua faapea ua Merge le Matagaluega ao le mea moni e lei aloaia i o outou taimi tasi la lea mea sa ou fia pai iai.

E le i aloaia na tau tupu loa le mea lena taumafai loa fomai laa strike, ou te vaai atu ua fefe loa le Minisita sa iai toe tapuni loa le mea merge lenei , i le

taimi la lenei o le mea la lena o le faatoa aloaia la leaga e iai faiga sa matagofie na sauni solaupule lelei le PSC aemaise lava, e leo nao tagata Ofisa PSC na feagai ma le Matagaluega o le faatumutumuga, o le taitaifono ma lana Komisi masalo pe toetiti 2 vaiaso o feagai ma le Matagaluega, feutagai, talanoa aua e faapena le mea ae o le measili matautia iai vaitau lena.

O le mea lena lea ou te fia talanoa auiliili iai le mea. Leaga o vaitau ia sa ese le totogi ma le faiga sa fai ai le NHS ese le totogi o le vaega lea , o le mea lena lea na alai ona esese lea la faatoa oo le taimi e taatia lelei i le fua a le PSC le tagata faigaluega a le Matagaluega se ua fialia a le Matagaluega o tala la aumai ia te au, ua matua fialia le fomai ma ao le agaga sili lea na tau ana ona faailoa atu i le Sui Usufono aua e te popole, faapena le mea o le fofu alamea e pei o upu o le atunuu , feutagai le tofa ma le faautaga la foi e faafofoga mai Fomai ma le Matagaluega faafetai atu lo outou gaga faamaopopo , ae o lea ou tali manino atu i tulaga ia lau Afioga Sui Usufono leaga o taimi ia sa lei tuua faatasi ae sa iai le FK na tapena i lena faigamalo ina ia merge peitai e lei mafai ona faatino lea la faatoa mafai ona faatino le vaitau lenei faafetai .

**FOFOGA FETALAI:** Ia malo faafetai measili lea ua saunoa ma manino le Afioga i le Minisita o le mea lava lea sa fautua atu ai i le sui mamalu , aua tatou te faaaogaina ni faamatalaga mai tua atu ona e popole foi ile faafogafoga mai o le atunuu ona avea lea ma mea o le a faapopoleina ai le atunuu, ae tulai mai faaumai mai lau saunoaga ua maea lou taimi.

**Tofa Hon FAIMALOTOA KIKA STOWERS-AH KAU:** Na pau a lea o si tulaga e lagona lou faanoanoa ona o le saunoaga a le Afioga i le Minisita o lau tala lea faiatu o se lauga faaoloataua e le faapena lo ta nei tagata o lea faailoa atu mea o lea talanoa ai le toatele.

**FOFOGA FETALAI:** E manino a le sui mamalu a na faapea e te usitaia tatou Tulafono Tumau, e aua le aumaia ni tala mai tua ia e lelei. E sao foi le Minisita, o le faaoloataua ma pei a faapopole ai le atunuu i lau saunoaga. Ia a o le mea lea ia o lea ua saunoa manino le Minisita ia atonu ua faamalieina ai foi lou finagalo. Ia ae i ai le manatu ia faamae'a maia lau saunoaga o lea ua maea lou taimi.

**Tofa Hon FAIMALOTOA KIKA STOWERS- AH KAU:** Ia faafetai. Ae o le mea mulimuli a ia o le faafetai, o le Matagaluega o Tina ma Tamaitai. Faafetai i lau Afioga i le Minisita, o le vaiaso lea na te'a nei lea na ou savalivali atu ai saina le feagaiga o le matou vaega muamua o le \$1 miliona, le lua galuega faitoalua ma le Minisita o Tupe, le Komiti ma le Aufaigaluega faamalo atu mo la lea tulaga.

Ia ae pei o nai mea laiti atonu e mafai ona ou talanoa ai aua o lea ua ou talanoa atu i mea taitasi pe afai ona o Au o le Tina o Au o le Tamaitai e toagaogao matou i le faaleoina o nisi o mea o lo o i ai i totonu o le Matagaluega lea ua faapena ona vaaia pei ua tau se'e ese, pei ua leai se fesoasoani mo polokalame ma le tulaga sa i ai ia le faaleleia ma le atinae o Tina ma Tamaitai ina tau maua le avanoa tutusa foi lea ma faapaleni le vaega o Alii ma Tamaitai. E tilotilo foi i nisi vaega e pei o lena e i ai le isi vaega o le Tulafono e aofia ai Tupulaga Talavou.

**FOFOGA FETALAI:** Ua mae'a le taimi o le sui usufono.

**Tofa Hon FAIMALOTOA KIKA STOWERS AH KAU:** Ia, ae faafetai tele lau Afioga i le Fofoga Fetalai. E faafetai atu foi i le faafogafoga mai a le atunuu aemaise foi si ou Itumalo. Ia, o se faamatalaga lena e tusa ai o le tilotilo lautele a lenei usugafono e tusa ai o le tatou Tala Faatatau Autu o le Tupe 2023/2024 e pei ona ua opea nei i luma o le Maota Fono. Ma le agaga faaaloalo, faafetai.

**FOFOGA FETALAI:** Ia, ua maua le avanoa mo se tasi o sui usufono o fia saunoa.

Ia tulai maia lau Afioga i le Sui Fofoga Fetalai, Sui mamalu mai Aiga i le Tai.

**Afioga AUUPAAU MULIPOLA ALOITAFUA MULIPOLA:** Le eleelē ia gatete ia oe i luma o le Alii, i luma o le Atua o Iakopo o le na te liua le papa e fai ma vailepa, o le papaalā foi e fai ma vaipuna.

Lau Afioga i le Fofoga Fetalai fai mai se vaega o le tatalo e masani ona o tatou tatalo ai i taeao taitasi, aua e ou le Malo ma le Mana. E faapena so'u lagona i le taaligoligoa o lenei Maota ona o Oe le Atua e ou le Malo lenei ona o Lou Mana.

Lau Afioga i le Fofoga Fetalai, ua o se titi togotogo matagofie le sauniga i le taeao ua mavae na se'i o tatou afe ai i le Atua foafoa o le foafoaga o le mata'isau ma ua a'emalo ai le sailiga ipo nai Avalua, pei o lea upu a le Atunuu. A ua manutoao le pule faamalumalu a le Atua i lenei aso i le Fonousu a lau Palemene.

E faatalofa atu Samoa le atunuu pele, o fea lava o au i ai peau galugalu o le faasalalauina o le Fonousu a lou atunuu, e faatalofa atu. E faatalofa atu le Ao Mamalu o le Malo ma lau Masiofo i le lua tapuaiga, Sui o le Fono a Sui tofia ma lou Faletua, Faamasino Sili le Faamasinoga Mauuluga ma le Faamasinoga o Fanua ma Suafa, e faatalofa atu i lenei vaega o le aso.

Le usoga a Tumua ma Pule, Ituau ma Alataua, Aiga i le Tai ma le Vaa o Fonoti, Aiga ma latou Tama o Tama ma o latou Aiga, o Aiga Tafa'ifa, Tafa'itia, Tafa'itoto o Aiga foi e Tafa'i i fetalaiiga, e faatalofa atu.



E faamulia'i le faatalofa atu a lenei sui usufono i auauna totofi a le Atua a ua a o i ai faalupega o lenei atunuu, faamalo le tapuai mai a o alo fonu lau Palemene i lenei vaega.

E faatalofa atu i le Faigamalo i Sasae ia Tutuila ma Manua, le Afio o lau Afioga i le Kovana Sili ma le Lutena Kovana, Peresetene o le Faamasinoga, Fofoga Fetalai ma Sui o Maota e lua, faatalofa atu. Ae a ni ou tupua tausi ma tolotolo faitauina o Samoa, faamalo le soifua manuia.

Lau Afioga i le Fofoga Fetalai ou te fia pa'i lava i lo'u Itumalo ae paga lea, ia e manatu atu i le taimi, lo'u Itumalo e auliuli se taimi ona ou pa'i atu lea ae se i su'i tonu le mata o le niu se i fai so tatou sao ia Manuvao e tusa ai o le Tala o le Tupe 2023/2024. O le tausaga na te'a nei e le i i ai se leo o lenei Itumalo ona sa aafia au nei i ma'i o le tino, tulou le Maota. Ae ui o lea e le faaititia le vivii a'e o lo'u loto i le Alii ua e toe faafoisia lou nei malosi.

O le Tala Autu o le Tupe, e 4 ni vaega taua ua ou matauina i le Tala o le Tupe ua folasia i le Maota.

- 1 O le mea muamua e foliga mai ua manava le toaalii ina ua le toe i ai se nonogatupe a le Malo ae fulisia le totogiina o ana aitalafu;
- 2 Siitia o le totogi o tagata faigaluega a le Malo;
- 3 Ua faaola totoga le poloketi o le \$51 miliona tai miliona a le Itumalo, ou te o'o i ai se taimi e faaleo le fiafia o Aiga i le Tai;
- 4 Siitia o tupe faagaaga i atunuu i fafo e leo ai le Malo, po o a ni faafitauli e tulai mai, Foreign Reserves.

E momoli atu le faafetai a lenei Itumalo i lau Afioga i le Tamaitai Minisita o Tupe, faamalo i lau faasoa limalelei i lenei Tala o le Tupe ua taatia mai, sau se taimi fo'i atu sa'u faafetai. Ae i le tulaga a ia aoatetele o le motugaafa a lenei Itumalo, se i ou faasolosolo atu nai Matagaluega e fia avatu i ai se fautuaga. A avatu se fautuaga e malie, ia fai lena mo i tatou, a faaletonu toe fo'i mai i le Sui o Aiga i le Tai o lo o tulai.

Lau Afioga i le Minisita o Leoleo faamalo galulue, pei lava ona ou fai atu o se Matagaluega sili lenei na ese lo'u alofa i ai. Sa ou matauina le paia o le Palemene ina ua autovaa mai Matagaluega eseese a le Malo ma Itutino Tumaoti i lalo o le Lipoti a le Ofisa o le Suetusi. Na ou fesiligia le Matagaluega lenei, o fea e maua mai ai a outou Tupe Maua? O le tali, e maua mai i faasalaga.

E faapena foi ona ou fesiligia le LTA (Land Transport Authority) ona o le mea na ou talanoa muamua i ai, ia ae pei e foliga mai e vasaga. Ae peitai e tautala lava ma le faaaloalo e solituina lenei Palemene ona o mea ua ou vaaia. E avatu faafautuaga lau Afioga i le Komesina aemaise le Matagaluega o Leoleo mo le saogalemu lautele o le tatou atunuu. O lo o i ai le laina lea ei le ogatotonu lea e faaupu e tatou i totonu o le auala, o le laina faatalitali. Ua matua'i ou mautinoa ma matauina le tele o le taimi e faaogasese e avetaavale. E pei lava ona ou fai atu, o i lea e maua mai ai tupe maua a la outou Matagaluega, e le o uma ona ao tupe ia talu ai ona o lo o i ai le vaega

e le o mauaina le au solitulafono. Ua avea le vaega lea o le auala ma mea e paka ai le taavale ae alu le tagata e tope mai le faatau, ae faaemo fa sign foi ie o le taavale e foliga mai o la e faaletonu lona auala, a ua avea ma se vaega e poloka atoa ai le vaega lea.

E fautua atu i le mamalu o le Matagaluega ina ia outou mataala, o a outou tupe na lea e le o maua mai, o tou forecast revenue na, aemaise lava le sau i i i le Loto Samasoni seia pa'ia o i Vaitele. Ae o se tulaga lamatia o le soifua o tagata feoa'i, ae ui o lea taatia atu i lau Afioga i le Minisita o le Matagaluega o Leoleo.

Le Matagaluega o Galuega Tetele, faamalo faafetai mo galuega, ae peitai ou te talanoa lava au ia i le manaomia e lou Itumalo o le toe faaleleia o nisi vaega. O lau tilotilo i le Tala o le Tupe, faafetai ma ou te mautinoa o se tasi vaega o le Tala o le Tupe ua taoto o le a faatino ai lou uafu pei ona e finagalo iai. Ona ou faapea lea, sa ou laasia i le vaiaso na te'a nei lo'u motu lea i Manono-tai, sa ou toe alu lava se i ou toe tilotilo ae ou te le i lagaina sau upu i le Maota lenei. Lau Afioga i le Minisita, faafetai mo le poloketi lea o le a amatamea ai se vaega o le seleni ua to mai. Ae manaomia pea le toe faaleleia aemaise lava i le auala savali, e manaomia lava le faaleleia o le auala savali. E moi e le i tupu muamua a o lau talosaga lea, o le taimi ma le mea e tupu ai ia e alofagia mai lau Afioga i le Minisita. Na ou asia tulaga ia, ae o se vaega foi ou te mautinoa e lilifa agai i le Minisita lea o le Siosiomaga ma le Punaoa Faalenatura. Amuia outou i Upolu nei, amuia le Motu tele i Salafai a afaina le talafatai ona ou faalogo lea i le siuleo lea, ua si'i le afioaga i uta. Aua ea? E tetele eleele. A o si ou Motu lea, ia o fea a si'i iai si tamai Motu a, o la foi e tau si'i mai le isi pito o le motu. A o lau tatalo faamolemole le Minisita e ou le Matagaluega ma le Portfolio lea, ua matua 'aia a lo'u Motu, ia e alofa mai. Ou te manatu foi o lea e iai le vaega seleni na ou tilotilo iai i le Tala o le Tupe ma ou te mautinoa, o au la e ona le seleni lea e faatino ai le vaega lea o le scoping po o se vaega e fai ai le saililiga o le vaega lea.

O le mea lea e talosaga atu ai ia outou Afioga, ai so'u fiafia ae faapea mai a oulua Afioga, o taeao tatou te o ai se i oulua molimauina le afaina o lo'u Motu lenei. O le Motu lenei e le o se tala e aveane ai, tasi lea Tourist Attraction o le tatou atunuu lenei ma o se Tourist Destination lelei a. E i ai le papalagi e fai ma ana masani le malaga atu, na oo a lea i le taimi na ou fesiligia ai. Aisea e te fiafia ai e sau i lenei tamai Motu? Fai mai le talitonuga o le papalagi lenei o le tamaloa o le Saientisi, e ese a lau manavaina o le ea pe a ou oo mai i i. Ou fai atu, o le a le eseese? Fai mai o motu ia o Upolu ma Savaii pei e mamafa lau faalogo i lo'u manavaina o le ea, a o le Motu lea e te sau ai, e mama. Ou fai atu o le a le mafuaaga? Fai mai ia aua foi e leai se pollution, e leai se taavale ou te tilotilo i ai. Ae sao lelei a. O le mea lea, tasi lea vaega ou te iloa a lelei le faatinoina o lou Motu lea, tele tatou tupe e maua mai le Tourism Sector. Ae ui o lea, taatia atu i o outou tafatafa a outou Afioga i Minisita e ou le Matagaluega lea aemaise foi outou anavatau.

Le Minisita o Aoga, ia malo faafetai o le Aso Lulu talaatu taeao e umusa ai le isi galuega tele a lou nuu lea i Manono-tai i Salua-tai, matagofie le faleaoga. A o lau fautuaga lau Afioga i le Minisita e le o lava faiaoga, e i ai le aoga e tasi po o le lua faiaoga po o le tolu foi la e iai. O lau fautuaga ina ia faaatoa le lelei o aoga ia e lua, e fou le Faleaoga i Faleu Manono-Tai, lea foi la o le a fou le faleaoga lea o Salua, taatia atu i lau Afioga i le Minisita. E pei a ona ou fai atu e laitiiti le Motu a o le tele ia o tagata lea e tutu mai tulaga tofi maualuluga o le Malo. Ou te le tau fai atu i lena itu, mafua i se a? Leaga o i na a'e mai ai le soifuaga ma le olaga lea.

Ona ou oo mai lea i le tulaga lea i le Minisita o Faamasinoga ia po o le Minisita foi o le Siosiomaga. O lo o ou talanoa i le mataupu lenei ona na afaina ai a'u, o le mataupu e uiga i eleele faaleaganuu. E i ai se taimi po o le 2019 na faafuasei a ona fuaina le eleele lea ou te i ai i tai i Manono. O le a ou le ta'ua se Itutino po o se Community po o se Faalapotopotoga na eseele o matou talitonuga. E pau a lea ona e afua mai se faaiuga a le Faamasinoga o le 1896 le Court Grants na agai ai i eleele faaleaganuu, talu ai sa agalelei se tasi o Tama o lenei Aiga ina ia faamatu se vaega eleele o lona eleele e mapu i ai le Misionare na taunuu atu. Peitai o lo o ua matua atagia ma ou mauaina le faaupuina o le foai i lona agaga lelei. E leai se agaga ia te au faapea e gagavale ona o le foai na fai e tua'a. Leai. Ae o le faaupuina o le foai o lo o manino lelei. Peitai ua aumai le Iuga o le Faamasinoga i le 1896, le Court Grant ua ese la ma le faaupuina o le foai, o i ina na mapuna ane ai se feeseeseaiga lea.

**FOFOGA FETALAI:** Ia ou te fautua atu i lau Afioga i le sui usufono mamalu, lau Afioga i le Sui Fofoga Fetalai ona o lea ua fai ma taua faaiuga o Faamasinoga. Ia e i ai a le faaeteetega foi o le Maota, ina ne i faafofoga mai le atunuu i tulaga faapena, ae e i ai le faaeteetega foi ona o lea ua i ai le faaiuga a le Faamasinoga. E pei o le tulaga lena ae tuu atu pea i le sui usufono mamalu.

**Afioga AUUAPAAU MULIPOLA ALOITAFUA MULIPOLA:** Faafetai lau Afioga ou te usitaia lau... Ae o le uiga o lau faamatalaga leai e usitaia iuga a le Faamasinoga ae o le uiga o le tala pe a aumai e faatusatusa agai i le tatou faavae, pei o i ina lea e mafua atu ai, toe faatusatusa la i le Komisi Faufautua o Fanua Faaleaganuu ona o lea o lo o taua pea e le tatou Faavae, i le leai o se isi faiga e mafai ona fai agai i fanua faaleaganuu e faapea e le faaliliuina ese eleele tau le aganuu, e ese mai la i le LTRA 2008 lea ua uma ona fai i ai le Tulafono.

O le vaega la lea ou te fia talanoa i ai, e pei e foliga mai o lea o lo o i ai se cap i i le vaega lea ma le tatou Tulafono lea o le Faavae, pe a ou fua foi la i le Komisi Faufautua o Fanua Faaleaganuu lea o lo o i ai le malosiaga. O lo

o faapea mai ina ia toe iloilo Tulafono mo le aafia o Fanua Faaleaganuu, pau lea o le agaga lea e avatu ai e au nei.

Lau Afioga i le Minisita e ou le Matagaluega, pe le i ai se vaega ina ia toe faamanino lelei la vaega ia. Vaega ia i le taimi na i ai tatou i le Colonialism ma le Faavae lava lea e tau mai faapea, po o se tasi lava faiga e fai i le fanua faaleaganuu e le mafai ona faaliliua, lea e Faa-Peretania mai, otherwise however, whatsoever. Pau a lea o le agaga a o le Faamasinoga e aloaia lelei le Faamasinoga. Pau a lea ona ua mamao i tua a o lea e foliga mai i lau tilotilo e i ai se vaega e opuina ai le talanoa mai a le Faavae, le talanoa mai lea o le Faavae e tusa ma iuga ia.

O le mea lea e faamalulu atu a o le agaga ia e usitaia lelei a Faamasinoga e le mafai ona le usitaia ae pe le mafai ona teuteu ina ia pipii lelei la le faaupuga o le Faavae ma mea ua tulai mai. Taatia atu i lau Afioga i le Minisita e ou Tulafono.

Ona ou pai mai lea lau Afioga i le Fofoga Fetalai...

**Afioga Sulamanaia Fetaiai Tauiliili Tuivasa:** Lau Afioga i le Fofoga Fetalai pe maua se avanoa...

**FOFOGA FETALAI:** Ia o le a se....

**Afioga Sulamanaia Fetaiai Tauiliili Tuivasa:** Ioe e pei e matau atu o le mea foi lena e fautuaina le sui usufono mamalu e tau aloaloese ma Faamasinoga a o le popolega o le sui usufono, o lea ua toe talanoa i le Faavae. 102 i tulaga i fanua faaleaganuu o lo o malu i totonu o le Faavae, a o lea pei e aumai lana saunoaga toe teuteu le Faavae.

Mo lou silafia le sui usufono, teuteu le Faavae pe a maua le lua vaetolu, ae o le popolega lea ua talanoa i le Faavae, ia o le popolega lena o le sui lau Afioga i le Fofoga Fetalai. O lea e malu fanua faaleaganuu i lalo o le 102 ae pei o le agaga lena e popole ai le sui.

**FOFOGA FETALAI:** Ia lea ua maua atu o le finagalo lava ia o le sui usufono mamalu o lo o ave faafautuaga i le Minisita e ana le Tulafono ma silasila agai i ai i le Faavae ae le o i ai se mafaufau faapea o le a sui le Faavae. O le lauga faalauaitetele a le sui usufono mo le agai i luma aemaise o le faamalamalamaina o nisi foi mea na tutupu i le taimi ua sola. Ia, lau Afioga i le Sui Fofoga Fetalai.

**Afioga AUUAPAAU MULIPOLA ALOITAFUA MULIPOLA:** Malo faafetai, faafetai foi le sui usufono. E leai e manino lelei a lou sui seiloga ua maua le lua vaetolu e palotaina ai le suiga o le Faavae ae ou te le o fai atu ua ou manao e sui le Faavae. E le mafai ona sua faatoatasi e au lea e i ai le Palemene o le latou matafaioi lena. A o le uiga o le faamatalaga o se cap o

lea e tatau ina ia mapo lelei le taoto o le Faavae ma mea ia tutupu. Pau a lea, a o se agaga e sui le Faavae, ia e mafai a ona sui le Faavae. O ai e suia? E sui e le Palemene. O le mea lea e faamalulu atu i le sui usufono e maua lelei o lea ou te manino, ui o lea taatia atu lau Afioga le Minisita le tulaga lea.

Ona ou oo mai lea i le poloketi lenei o le \$51 miliona mo itumalo e 51. E momoli lau faamalo i lau Afioga i le Minisita o Tupe aemaise foi le faigamalo lau Afioga i le Palemia ma le Kapeneta. O aso ia faigata ia na ou alu e fai sau loan, leaga o au le isi tagata e loan. A ou alu e loan sau \$1000 e manino a e atoa le masina o faataamilo, a ou maua foi, o la e i ai le isi mea la e mamafa mai tua o le tologiina o le aitalafu, aemaise le Faletupe lea o le Atinae. O le a le mea la ua tupu nei? O lea ua avatu i o outou aao Itumalo Taitasi e lavea ai ma lou Itumalo, decentralize, decentralization le mea lea ua i ai, ua tautai mapuna uma Itumalo. Ou te faafetai foi i lau Afioga i le Minisita e ou le \$1 miliona lea lau Afioga i le Minisita, i le manaia o le tau unauna laitiiti mai o ni mea sa ponatia ae faafetai o lea ua tatala mai la outou tofa, ua le na o o se vaega ina ia mautinoa e toe oo mai le tupe ma fanau mai le tupe aua le Itumalo, tulou le Gagana a o se vaega foi lele lea ua fesoasoani ai le Fono Faavae e pei o pili o tamaiti aoga, ua amatamea Fono Faavae mo auuala galue ae faaatoa e le Minisita o Galuega Tetele. O se agaga fiafia lea ia te au, manaia tele lenei... Ailoga o i ai se isi o toe ulufale i le Faletupe o Atinae aua o lea ua maua uma mea e fai ai le fatuaiga tautai. O le mea lea e momoli atu lava le faafetai ma le faamalo.

E faapuupuu se faamatalaga o le a ou foi mai i lou Itumalo lau Afioga i le Fofoga Fetalai. Le tapuaiga mamalu a lou Itumalo ia e leai se iota e mafai e se isi ona toe sui. Le paia i le Toafa o Alii ma le Toalua o Tulafale ma upu ia te oe le Fale Manono, faapea foi Usoalii ma Alo o le Malietoa, Fuaolefau ma le Pouli ma ou Tapaau, ae faapea foi Sa'u ma le Aiga Sa Sa'u, Alaalatai oe Sauma. Ia e le faagaloina foi o lo o tatou fai filifiliga faatasi i lenei vaitaimi Itumalo Faapalota ma le Afio le Aloalii, afio le Tamaitai e tasi o Aana ma le Matua Taulagi, mamalu mai oe le Tapaau o le Lilomaiava, maliu mai le Matua ia Peipeigamalie ma lo outou Toafa, lau Fetalai Tuagalu o oe o le Tali Fetalai, le Lauti na Laulelei ia te oe Satuimalufilufi. O lena ua maea le tatou galuega o le Fono Faavae o lena ua i ai.

Pau a o lea tatou galulue faatasi. E tasi le Minisita o le a toe avatu i ai sau faaoololomaau, to maia lau Pule lau Afioga i le Minisita o le Falemai, o lo o i ai le eleele o si o matou nuu i Manono-uta taatia atu i lou finagalo faatamalii, o le motu i tai. I lau tilotilo ma le savali, tulou le gagana ua mavaevae le eleele, ua faigata ua soua foi, a o le a sou finagalo o lo o i ai le vaega eleele se i o matou soalaupule ma si o matou nuu aua se falemai o lenei Itumalo. O le faafaigofie lea i lau tilotilo aua ua tofa vaa uma le matou motu i tai aua le feoi mai uta, ae taatia atu i lau Afioga lau pule aua le mamalu o le Palemene ma le faafogafoga a le atunuu.

Taliu mai se faamatalaga, ia le tatou Itumalo ia tapuai maia o lea la a faagasolo atu a tatou fuafuaga faataatitia o le tatou \$1 miliona. Ia outou lava onosai aua e le faigofie le tatou Itumalo e 3 motu a o lea lava e taumafai atu. O le Aso Toonai ua tea nei sa ou taamilo ai i tuamaota o le tatou Nuu i Mulifanua aua le vaaia o a outou auala e pei ona aumai ai le talosaga. O lo o ua mautu mea uma lea foi ua i ai le fuafuaga o le faataunuuina uma lava e le o toe umi, ae ia lava mai lo outou onosai.

Ona ou afe atu lea e le mafai ona tuua, o le soifuaga nei lava ia e manino e ola faatasi le saito ma le titania. Lo tatou nuu i Salua-uta ou te le ulutoina le tofa, se i saili ane po o ai na faia. Na ona ou faapena atu o lo o i ai le agaga i lenei vaiata e leaga ai mea, se i saili po o se atalii o ai na mafua ai. Na na ou faapea atu, ae ui i lea ou te faamagalalo ia te oe na e faatamaia lo tatou fale fou lenei e i ai, na ona ou faapena atu, tatou galulue faatasi tatou apesoe faatasi e faatuatua i le Alii a ua ta a le taimi o le Atua e leai lava se isi e faatautee e leai se isi e faatautee. Ua lava lea tatou galulue faatasi.

Ia foi mai se faamatalaga i le tapuaiga a Le Ao Mamalu o le Malo ma le Masiofo, faafetai mo lau tapuaiga. Faifeau o lo o utuina lou agaga aua se filemu o Aiga le Tai faamanuia le Atua ia outou, faamanuia i lou Itumalo, Alii ma Faipule, Faletua ma Tausi, Saoao, aemaise a tatou fanau tuuina atu i aoaoga, ia outou maua se Aiga le Tai e atamamai o latou tagata.

Faafetai lau Afioga i le Palemia ma le Kapeneta i le Tala o le Tupe, faafetai i lau Afioga i le Fofoga Fetalai. Faamanuia i Ofisa Sili o Pulega o Matagaluega. O outou e toa atu i ai le faigamalo lenei. Manuia Samoa, manuia Aiga i le Tai o faafogafoga mai. Manuia le Palemene. Faafetai ona o Iesu.

**FOFOGA FETALAI:** Ia malo saunoa faapea foi le saunoaga a lau Afioga i le Sui Fofoga Fetalai po o le sui usufono mamalu mai Aiga i le Tai. Atonu o lea ua faafogafoga mai le Itumalo o lea lava ua e tautino lava nisi o mea taua ma atinae taua o le Itumalo lea ua faafogafoga ma le totoaga le paia o le Kapeneta. O le mea lea malo faafetai mo lou sao foi i le tatou Tala o le tatou Tupe.

O lea ua matau atu ua fetai lava le lauga a le Sui Fofoga Fetalai ma le tatou taimi faatulagaina o lenei aso. O le mea lea, ia tatou sailiili malosi aua le aso a taeao.

Ua faamalo le usufono lenei aso i le paia o le tatou Palemene. E toe faafetai atu i sui usufono mamalu uma sa saunoa i lenei aso. Malo lava tapena a o so outou sao foi lea mo le taumafaiga o le tatou galuega.

O lea ua tatou taunuu mai i le tatou taimi manava o lenei aso Fono, ua tatau foi ona fai se tatou malologa tatou sailiili malosi, talo soifua i le alofa o le Atua i le aso a taeao e toe faaauai ai le tatou galuega.

Faafetai atu i Ofisa Sili o Pulega o Matagaluega ma Faalapotopotoga Tumaoti a le tatou Malo aemaise foi o nisi o le tatou atunuu, o lo o auai mai

i le tatou taualumaga faamalo le tapuai. Samoa ma lau tapuaiga malo le fai o le faiva, faafetai mo le tapuaiga i lenei aso.

Ae tatou te le i tolopo ou te talosaga atu i le sui usufono mo Falealili 2 se i e saunia mai se tatou tatalo e faaiu ai le tatou Fono. Lau Afioga i le sui usufono mamalu.

*Na tolopo Taualumaga a le Fono Aoao Faitulafono i le itula e 1:02 i le afiafi seia aulia le Aso Lua, 27 o Iuni 2023 i le itula e 9:30 i le taeao.*